

НУЯНЬ ВИДЯЗ

Арселман  
монь,  
арселман...

*Келей ёвтнема, ёвтнемат, ёвтнеминеть,  
тешкст, статьят, рецензия*

16+

Нуянь Видяз  
**Арсеман, монь арсеман...**

«ЛитРес: Самиздат»

2018

## **Нуянь Видяз**

Арсеман, монь арсеман... / Нуянь Видяз — «ЛитРес: Самиздат»,  
2018

Это сборник произведений разного жанра: повесть, рассказы, миниатюры о природе (на эрзянском языке), публицистические статьи и заметки (на русском языке).

## Содержание

Кавтосто вейке	5
Вант юрс	6
Вастовома	6
Преввелявкст	9
Терентий Тимофеевич	12
Казнеть эрсить эрва кодат...	14
Вандыде мейле	16
Арсят истя – лиси лиякс	17
Вана сон кодамо, Наталь!	20
Арсезесь топавтовсь	21
Уле ушодкс ды уле-уле пе	25
Кевень седей	30
Кода тетя пшкалить?	30
Кеминь, учить эйсэнь маней зорят...	34
Эсеть эйстэ а туят	37
Каня сельметь таргизь!	39
Азгондят, теке лытагай!	43
Весе ушодови эйкакшпингстэ	45
Конец ознакомительного фрагмента.	47

## **Кавтосто вейке**

*Кавто ёвтнемасто келей ёвтнема*  
Медаленть кавто ёнксонзо  
Валмеревкс

## Вант юрс

Васенце пелькс

### Вастовома

Ардан ошсто. Бусонь меельце лотксема тарканть пачкодезь, ванан, ахоли кедьсэнзэ, энялды озавтомс сэръс аволь сэрей, шожда, ёлганя рунго ава. Оршазь, вановтом вакска эзь юта, кизэкс. Лангсонзо нурыка ожа сэняжа тюс, мерть, пачк невтиця ковтыне ды нурыкине, кумажадо верьга, чопода-сэнъ понкст. «Сэнь нимилиявне...» – ювк ютась пряван.

Урныгайсэнтъ съкамон, тарка уле. Мекс а саемс? Лоткинъ. Венстия вить кедем ды келес панжия кенкшентъ. «Озак!» – меринь те шкастонть эсь пачкан, авастонтъ сельмень апак сае. Васня «пассажиркам» лашк путызе чевте озамо тарканть эседензэ стака, эрьва мезде пештызь коцтонъ юдманзо. Мейле венстизе озамо тарканть икеле кундамонть вить кедензэ ды керш пильгензэ кепедизе урныгаентъ. Кепедизе-саизе юдманзо ды лоцьк озамсто путызе цитниця штадо кумажанзо лангс.

«Яла кись истямо кувакакс а карми марявома, яла аволь съкамон... – кивчк ютась пряван мелесь. – Мекс а озавтомс ломанентъ?»

– Ды ков усксамак? – мизолдозь варштась чамазон ды пшкадсь тень вакссон ардыцясь, гайги вайгельсэнзэ пештизе урныгаентъ потмонзо, матрызе ювк шкас моторонтъ кувака моронзо.

– Ков мерят... – паро ёжосо меринь каршонзо теке лувсонть, верьга вайгельть, кистэнтъ вановтом апак сае, монсь арсезевинь: «Тонь марто, ванан, дугай, а матедеват ветямкаеть вельксс, набоят, неяват, аволь тухмужатнестэ, аволь айшатнестэяк... Куш эрямосонтъ мезть а эрсить! Лия «сэтьмежасонтъ» зняро кежть-апарат кирдевшнить, а онкставить мейсэяк».

Ардано. Кись валаня, келей, цивтёрды чипаентъ каршо, теке парсте шлязь-нардазь сулика. Моторось урны, прок псака лембине-чевтине таркасонзо стакачинь апак маря. Вайгельпе, омбоце, колмоце... Лови сынст выжнэзь пувиця вармась. Вальматнень тона ёнга сравтневсть ожо тюссост оймень кецневтиця товсюронь паксятне. Чиить ваксканок, мерят кияк тандавтынзе, пиже чама килейтне, пичинетне, калькуракштне... Таркань-таркань полавтнить сынст дюм пиже кукурузань гектартнэ. Юты тарго, мельганзо омбоце, ды теевить лангсост азорокс комбайнат, ушодыть урядамо тундонь-кизэнь перть, вейсэ Чипазонтъ марто, таштазентъ.

«Кить, кить, кить... Зяро эйтэст янсто саезь ведь потмова, ведь ланга ды коштка сравневицятнес? Кияк ёвтасы? А мода ланга чииятнеде ледстямс стувтыть? Зяро ломанесь эскели, содавлия, эрямопингензэ перть эрьва кодат? Лововить? Текенекс, кие-кодат? Вейкесь янсто а лисни, омбоцесь пель эрямопинге ардтни машинасо, поездсэ, колмоцесь цюхаи пельтнеде верьга. Ней ламот арсезевсть ялго якамодонтъ. Икелень, лишмень шкатнень коряс, кадызе те «тевентъ», ловт, каназкадсь, секень вант, сядоксть. Ков те вети, кевкстнемс а мезть. Кшнинь, кевень, модань... китнеде башка, улеть кить пайстомочинь, кенярксонь, салыщань...

Кить, кить, кить...»

Аламос аштезь мария икеле ёвтазь кевкстеманть:

– Ды ков усксамак? – сертизе ютксонк каштмолеманть, лип варштась лангозон ды кевкстимим омбоцеде, черензэ вить кедьсэнзэ витнезь, содавиксэкс теевезь вайгелесь.

– А содан. Ков тетъ эряви, ков капшат? Мон, тень, – кудов, Пичелев, – аволь сеске, нурыка каштто мейле ёвтыя тарканть лемензэ, ков кирдян ки. «Кевкстни, кевкстни, паряк, – арсезевинь, – тензэ ёвтамат лемем ды тетялемемгак? Теке кадовсь...» Теке басом визькс саимим те чаво, аволь превей мельдентъ, янксезевинь. Мезень пежеть тейсь – пшкадсь омбоцеде?

– Вай, ды те монь чачома велем! Монгак тов... Яла мерить, паз арась. Эно кие тонь кучинить? – кецнезь ёвтызе мелензэ асодавикс киялгам, вайгелезэ седеяк гайгезевсь, велявтызе мизолдыця чаманзо монь ёнов, варштась икельганзо чииця кинь коцтонть лангс ды поладызе валонзо: – Лисни, минь ве велень. Истя? Тон кинь?

– Теня, кода тетя меремс, мон эрян Пичелесэ аумок, омбовелень мон, киньгак парсте а содан, – моторонть урноманзо изнязь, икелев, кинть лангс, ваношь ды ветямкаенть тей-тов черьказь, пижнезь топавтыя кевкстницянть мелензэ. – Ве велень, мерема, эрицят, ансяк аволь ве велень ломанть.

Велькссэнь-икелень чамаваномастонть понгони вановтозон асодавикс аванть чамазо. Аволь келей, а мерят – ваканшка, седеяк – пешксе ковшка, седе курок – теине. Черензэ валдот. Коня верьга вейкетьстэ керязь. Кадык а тарказонзо, видькстан: а вечкан раужо черть-сельмть. Мекс? Содык азё... А содан ды сюрту! Кирксала чаманзо вечкевиксэкс теи эль-эль редявикс будолмине марто виде судозо. Сельмензэ – менельчелькст, сэнт-сэнт. Варшты лангозот – салат. Паро – преветь а човоргадыть. Мизолксозо – чуросто кинь аватнестэ истямо неят.

«Зяро, содамс, иензэ? – токимим мель, велькссэнь чамаваномантень салава варштнезь. – Неяви, байтяк, ведьгеменьшка улить, апак кавтолдо. Паряк, эскельдыськак трокскаст. Яла-теке, кадык таркань-таркань черькстнизь чамакиськензэ сормсевкстнэ, срадыть сынь седеяк неявиксстэ сельмеужотнестэ, икелень вечкевиксчизэ эзь ола, нейгак вельмевтни вечкемань толкельнеть. Кемеви, нейгак цёратне сельмень конязь ваксканзо а ютнить. А сонсь, умок уш аволь од авась, ютни? Ну, те уш лия таркань кортамо, теде соды ансяк сонсь... Ды эрьвась эйстэнек – эседензэ».

Чатьмонезь, кистэнтъ вановтом апак сайне, ветямкаенть тей-тов велявтнезь, чаравтынъ колгансон мельпетнень: велень стакачитнеде, масторсонть теевикс зыянтнеде, певтеме кенгелематнеде ды... аватнеде, нурька понксесэ, валаня кумажа авадонтъкак. Эзинь кирдеве, велявтыя прям ёнонзо ды венствия келем, пшкадинъ тензэ:

– Леметь а ёвтасак? – полашт варштынъ икелень чамаваномантень.

– Мекс а ёвтамс? Ёвтаса. Наталия, Наташа, велесэ весе тень мерить велекс – Наталь, – ёвк чиремтизе прянзо ды, лангозон эльканясто ваношь, ёвтызе истя сеедьстэ ней вастневиця, куш кодамо кельсэ мазый леметь. Сеске теде мейле педявтызе вановтонзо велев тердиця-капшиця кинтень. Тень пингстэ кепедизе вить штапо кедензэ кенкшенть велькссэ кундамонтень. «Неяви, цёрась аволь кольнягайтнеде, аволь кодамояк альгач. Пелемс эйстэдензэ а мезть... – арсезевсь авась ускицядонзо. – Понгонинъ вестъ, куломазон а стувтови...»

– Леметь, мерема, ютавтови эрзянь кельс кода «тиринем». Кодамо мазый! Кодамо покш зэме эйсэнзэ! – эзинь кардаво содамс вакссон аштицядонть, таго кевкстия, куш тунь, торох эзинь сода, мезекс те тень эряви. – А кудолеменк? Велесэ, содат, кудолемесь – фамилия. Кинь улят?

– Вай, тон уш сюлынень пес бажат содамс, – марявсь, эзь вечкеве Натальнень меельце кевкстемам, куш мезеяк берянь, монь койсэ, эйсэнзэ арасель. Аламос чатьмонезь, поладызе: – Мон – Черькаень. Марсить истятнеде? – чатьмонезевсь элесэнзэ кирдевикс юдманзо седе ёнсто аравтомсто. – Черькаень Лиза, Черькаень Шура, Черькаень Нюра... Киньгак сода эйстэст?

– Конат эрить Пичепесэ? Марсинь, кода эно... Аламонь велесэнтъ содан, сынdest – марсинь. Минь, лисни, аволь васоло вейкеденек-вейкеденек эрятано, – ёвтыя мелем ды кекшнезь варштынъ икелень-велькссэнь чамаваномантень. «Ули-арась мирдезэ? Кода арась, истямо мазый, вечкевикс – ды арась?» – бизмолк ютась пряудемган апак терде мелесь.

– Мон, маряви, пелензэ «биографиям» ёвтния. Тон – ве валгак, – мерсь ардыця ялгам ды лепштинзе якстерестэ эль артозь човине турванзо, вальмаванть сыреждиця товсюронъ паксятнень лангс ваношь. Саизе кедензэ вере кундамостонть ды путызе юдманзо лангс. Мезть те лип шкастонть велясть пряудемсэнзэ, кодат мельть эвтсть-кашкасть, теде содась гайги вайгель верка авась ансяк сонсь.

– Теня, монь вельсоветэнь лемем Алексей. Алексей Андреевич. Кода? Туи? Мерить аламанеде лиякс – Алё, лиясто Лёня, – паро мельсэ, та-кода талнозь, прок од цёра, ёвтыва, кода монь «сёвныть». Чатьмонезевинь... Зяро тензэ? Монень марявсь, кевкстницянть коряс одан кеменьшка иеде. А вана кортавксонь, прянь ветямонь, веркачинь коряс сон, неявсь тень, – монь шкань. Валаня, човине ды лийканя вайгелезэ седеяк одкстомтсь.

Шкань-шкань теде-тонадо нурыкинетэ пшкалезь, шкань-шкань каштмолезь, эзь марявояк, кода ютынек буйкуншканть – кавто ёндо алкине пандосо пирызь эрзянь покш веленть – Валдайвеленть, мельганзо текекс кивчкадсь Пурнаесь. Те аволь кода умонь эли пек умонь шкатнестэ, ардат аволь крандазсо эли бричкасо, мейсэ ардтнесь содавикс Чичиков ялгась. Ней комсьвейкееце пинге, вейсэнть алтымань шка, а мезть вейкеня омбоце ваксс пунтемс.

Ютасть торох аламо, кавто кедень сурсо лововиця минутат, ды минь уш Пичелесэтяно. Икелень покш сюпав колхозонь конторанть, ней чаво покш кудонтъ, икелетяно. Чиресэнзэ кавто сыре рация килейтне важов вармань эрва лекствяксто, прок удомань пачка, састыне юхайть тарадсост. Эрвань эсензэ: кие арды, кие ливти, кие пейди-аварди, кие юхаи... Улить истяткак, кить оймень апак полавтне рамсиль-микшнить. Лиядо сынст иля кевкстне. Истя теи Пичелень прятв микшницяськак, Сеськеня Валюш, икелень конторанть каршо «Чивалгома» лавкасонзо.

Ютынек пекстазь удыця «конторанть» ды сеске пачкодинек велень ламо кудотнеде мазычисэнзэ явовикс кудонок икелев. Сон – минек, монь, куш... Зяро вийть, мелявкст путынь – теемс лембекс ды, аламошка пря шнан, васолдо неявикиэкс, – а онкставить мейсэяк. Секс – монь.

– Мон пачкодинь, вана кудонок, – яволявтынь, «чиеманок» матразь, Натальнень. – Тонеть седе тов?

– Пароль... – эзизе прядо Наталь, мезе мериксэль, сонсь кургонь автезь, кода кортыть, вансь керш ёнов, монь сэнела-пижестэ артозь кудонок лангс. .

Арсезевинь: учось, мезе мерян мон. – Чавонь кедть ялгояк молевлинь, молемасть тесэ... аволинь солакадо. Канстось вана... кедьсант тарги.

Чарькодемс а стакаль, ков «менди» авась. Мон чатьмонезь нолдынь «ведьметнень», ды «айгором», кудонок ютазь, тусь кополсо. Эрва кода поркснезь асфальтонь кись прядовсь. Саинь витев чуваронь киванть, курокто – кершев ды, вирькиява ардозь, таго витев саезь, эртевинь Черькаень (Наталь ёвтыва) пирест келей, сэнхьстэ артозь кшнинь кенкшезэнзэ.

Авась ливчанясто панжизе кенкшкенть, кундась вить кедьсэнзэ икеленгзэ кундамкаентень ды капшазь валгссь урныгайтэнтъ. Саизе озамканть лангсто канстонзо. Ютасть монь ёнов. Панжия кенкшкенть. Стясь каршон ды, ашо пеензэ невтемга мизолдозь, лангозон ванозь, ёвтась тень ускоманзо кис сюкпря, тердимим инжекс. Панжизе пирекенкшкенть ды стака юдманзо марто – кудов.

А содан мекс, теке кияк кармавтымим: вановтсо ильтия икельдень туиця, сэнхьсэ оршазь, штадо пря аванть.

Ансяк мурдынъ ды ур-ур-ур туинь ардозь вирьга ютавтозь киванть кудов, мекшвелекс бизнэзевсть удемсормсевкссэнь кодат-бути ачарькодевикс, седеень китнэвтиця, вечкевикс мельть: «Кие те сэнхь сёлмо нармуннесь? Косто саевсь? Зяроце ие уш эрян Пичелесэ – неия васенцеде. Каня эзь сакшно теде икеле чачома велезэнзэ? Кодамо тувталось? Кода ды мезе илязо уле, эйсэнзэ мезе-бути ламотнень коряс лия, аёвтавикс, мазый, кецневтиця. Мезе? Содык азё!».

Содамс ломаненть, умок ёвтазь, – сэвема мартонзо пондо сал. Те кортыть истя – пондо. Икелень ним марто эринь комсьветееде ламо иеть. Зняро, текенекс, сэвинь мартонзо пондот. Ды мезе? Эзия чарькоде. Паряк, моньгак эзимим панжо педес-пес. Ламонь кувалма, арсян, текеде явовстькак эрямонь кинек. Сон вейсэнъ эрямо пизэнек каладомадо дёкушкадокшнось, чевгекс коськекшнесь, мон озакшнынъ таблетка лангс – верем ламбаськадсь.

Эсь кор, эсь ойме ды рунговий, ёжот... Эрвасо эрва мезть. Эрвасо Паз ды вакссонзо Идемевсь. Теньгак сынтемест, маряви, а явсак лиятнеде. Теке марто мезе-бути ули эйсэнэ, се, мезенть а мусак лиятнень потсто-лангсто. Умок редязь, пертьпельксэсь, весемесь, мезе Моданть лангсо ды мик Менельсэяк, вейкетьксчи а вечкить. Авейкеть пиземень байгинетне, авейкеть молекулатне, атомтне...

«Кодамо монень тев? Мекс педязь эйзэнь сонденэ арсематне? Мезе теде – ардсь мартон ошто, уския кудов? Ульнинь мартонзо час малава. Мезе тень эйтэ? Ульнинь ды – арасян! Ошов-ков эрва ардомстон киньгак ды озавтан. Ардан, кортнян, кевкстнян, пеняцян теньтонань лангс... Мезе берянесь?..

Вана сыречись а кадны, ормасонзо вансты эйсэнь чинек-венек, эрва косо, куш кудоскак иля совсе: пильгетне нузялгалеме кармасть, седеесь кирнявтнеме ушоли, лиясто пштикст педсить шоркаеме... А мон, айша, кие соды мезть нолдтнян колганозон... Мезеяк а тейт: ормат, сыречи – те вейке, а арсематне, конатне ней куродемизь, – те лия».

Эськан кортнезь, эзия редяяк, ютыя васня дринькаиця чуваронь, мельганзо ансяк лемезэ асфальтонь кинть ды вастовинь сэнсэ мизолдыця, оймень оймавтница кудом марто. Лоткавтыя урныгаем, нолдын эйтэнэ пильген масторов. Панжия пирявксонь келей кенкшенть, одс совинь урныгаезэнь ды совавтыя латалов.

## Преввелявкст

Кудосо эйсэнь учость ним Груня ды чокшнень, кадык а маласольгак, ашо ванькс нардамосо копачазь ярсамопельть. Дивансо, чевте-лембе таркинесэ, пря шны, венемтни рунгонзо, «оймси», атыка псаканок, прясто пильгс раужо Нузай. Вадря эрямозо. Сонзэ а талновтыть а эрва кува молиця войнатне, а миллиардонь питнесэ саламотне, а эсензэ икелечизэ. Чеертне курокармить сонзэ ноцкиеме пулодо. Мень а рай раужкаень эрямозо? Сон аволь ськамонзо. Ломантнень юткстояк ламот эрить сонзэкс. Пекест пешксеть, удома таркаст чевтетть – кодамо тетть лия уцяска? Мезекс содамс, кодамокс карми, икелечить?

– Теветь лиссть? Торох, весе яксевтить? – ютавтыве ланган вановтонзо, шкань ютазь пшкадсь тень стуворонть перька котьмиця Груня. Допрок икелень, ловт, судом алов, путсь ям вакан, чирезэнэ комавтсь цитница кшнинь пенч. Таргась стувор потсто пеель ды каштмолезь печксесь розень, мекс-бути мерить тензэ раужо, кши. Каня сон эрси истямо, раужо? Тень теезь, таргась кельменькайтэ «чай» марто суликаны банка. Эйсэнэ кирдеви арвотикшень ведь. Панжизе ды нуртысь тень, «Алёнь кечинес», зяро эряви тюжа ведтенть. Сеске пештизе аравтозь кедьгенть лакиведьсэ. Човоризе. Качады, качады кода арвотикшесь! Истя кодамояк лавкань чай-тикше а качады.

– Пенчесь учи, ямоськак кшинть марто... Ярсак. Ужока, а таблеткат симить? – мель путсь, якась мирдензэ мельга ковгак-зядояк а капшиця Груня. Седе малав, ловт, улонзо алов, айгизе ям ваканонть, вельтизе, илязо кельме, чай кечиненть. «Чоп вачоль, андома, ямозо илязо кельме...» – чийнесь Грунянь прядемга мелявт-мелесь. Кудонь ломань, лиякс те авадонть а мереват, сонзэ эрямо масторозо кудось ды перьканзо кардазтнэ-пирявкстнэ.

– Сюк-сюк, – меринь, свалшкань таркасон озадо аштезь. Вить кедьсэнь вакан чирестэ саия пенченть, керш кедьсэнь – цяпласто кшипечть, ушодын тувтамо, вачозь пекень пештямо. Ансяк пидезь ямось, вишкинестэ керсезь куяв сывель марто, марявсь тантейдеяк тантейкс. Коршинь-амолинь седеень витезь. Икелень путозь ваканонть чамдыя баксорсо.

Ярсын-теинь. Ёвтын анокстыцянть сюкпря ды стинь таркастон. Озынь стуворонть вакссо диванонтень – тесэ монь, кода аволь умок лемдия, «ловномань залом». Теске удсетянояк нузякс, ялатеке вечкевикс, Нузай марто. Тесэ ды диванонть песэ вальмалангось – таркат, косо кирдевить эрва кодамо лемень кулялопат, журналт, зярыя книгат... Течи калоньчи, почтань кандтнема-сравтнема чи. Секс истямо сюпав «ловнома залом».

Саия ды кандыя, каштор-каштор, кулялопатнестэ вейкенть сельмень икелев. Ловныя икельксэкс путозь статьянтъ лемензэ. Эзь туге мелезэнь. Таго политикадо, таго кочкамотнеде, салыцятнеде, авань полавтницятнеде... Налкставсть. Од мезеяк арась. Сынст таркас сельмень икелев апак учо лиссь ошсто велев мартон ардыця, нурыка понксесэ авась. Каня тердия мон сонзэ? Косто саевсть мизолдыця сэняжа сельмензэ?

«Вай, те мезень дюния? Мезень лецькай?!» – эль эзь пра кельпрястон марямга валтнэ. Превсэнъ челькень пес вельмесъ сень чачозо, конань марто вейсэ ульнинек аволь чить, част, ансяк минутат. Весемезэ. Ды вант вана... кадсь мештезэнь, а кемевияк, истямо анардтне-виця тешкс. Неия, кода сон, шождынестэ, кизэкс оршнезэ, стядо аштесь кичиресэ ды ахолясь, кедензэ полавтнезэ, ваксканзо «прянь-полдань синдезь» юхаиця урныгайтнень каршо. Мельсэнь, кода кепедизе ды путызе озамканть лангс юдманзо, озась, кода теевинек содавиксэкс, мезде кортынек. Ледсть мелезэнь сиянь баягинекс гайгиця вайгелезэ, сэнь сельмензэ, мизолк-сто панжозь човине турванзо.

Неия сэръс алкине аванть мазыйстэ оршазь рунгонзо ды мик аламнеде тандадынъ, зуйк мерсь седеем, пачкан ютась чевте-вечкевикс лембе. Теке марто содаватымим мезе-бути визьксэнь кондымо; прок мезеяк салынь каршон аштиця Грунянь эхшстэ эли теинь кодамояк лия пежеть.

...Мекс истя, мезде карминь, маряви, аймельгадомо? Мезе те, мезе мартон моли? Илязо уле... потсо пикстердиця вечкеманъ сятко! Илязо гувкаде эйстэнзэ... У-ух, авакай-тирякай! Кодат вечкемат васень нинть марто явомсто певтеме майсематнеде мейле? Эрдекстамот, сюдомат, сельведть, тандавтнемат... Мезть ансяк арасельть! Пазось эрвань ванстозо эйстэст, эрвань. Вечкема... Сон ансяк книгатнесэ ды певтеме ламо фильматнесэ-косо неяви мазыйстэ цитница, чиналсо пургсиця пазонь тештекс. Соват эрямонтень, чарькодъсак: кодат ансяк нулгодъкс, чопода тевть, ризкст-сельведть а лиснить эйстэнзэ!

А шумбращись... Седеесь, кона кирдеви таблеткань нежесэ, пыльгень чулгсетематне... Кодат вечкемат... Те истя. Ансяк философсь истя мерекшнесъ: «Ломаненть седейсэ меельцекс кулуть кавто ёжот: вечкемась ды кежень сазь авечкемась». Секскак кирьвали сон, сядо падежэ шназь «ормась», иетнень, орматнень, лиятнень-мезтнень лангс апак вано, трокскаст эскелязь. Астяко поэтэсь мерекшнесъ:

Нет, у седой реки  
Всё то же буйство,  
Всё та же быстрина и глубина...

Пурнынъ вийть ды вырновтынъ ушов стака килангов ветиця арсематнень, ледстнематнень эрямонь сеть ёнкстнеде, конатнесэ томбавкшнынъ а вестъ. Одс саия кедезэнь веёнов путозь кулялопанть. Таго седейколавкс – нусмакаватымим экологиядо покш, цифрадо пешксэ статьясь, се, конасо ёвтневи, кода ваятано эсенек шукшс ды мезеяк тень каршо масторсонть, ловт, а тееви. А тееви модамасторсонтькак. Куш черть раздек виень араздентъ куш мезеяк полавтомс паро ёнов! Мекс истямокс панизе-пидизе пазось ломаненть? Мекс? ...Пазось каня?

Омбоце покш, виев, седеяк превей сёрмадовксось – пертьпельксэнтъ ёжодонзо ды мезе учи планетанть, учи икеле шкасто. Солыть Пелевеёнксонь океанонтъ эензэ. Модамасторонтъ лембезэ кепети иестэ иес. Теде солыть эйтне, домкалгадыть ды келейгадыть морятне-океантнэ. Ламо модат ды масторт вельтявить, сы шка, ведсьэ.

Ды таго теке: киньгак те а талновты, весенень буень а содыця, певтеме ялатеке. Те – орма, конадо ламодояк ламот а арсить. Натой а содытькак. Тунь а мелявтыть «менельсэ» эриця ломантнеяк. Сестэ эно мекс монень оймамо а максыть неть стакачитне? Мекс певтеме ламотнень те дух а мелявты?

Омбоце чистэ сыргинь кудазораванть кармавтоманзо топавтомо – лавкав кшинь рамамо. Пачкодинь, перькан ваннозь, неень ды умонь шкань эрямо таркатнеде, кудотнеде, вастовикс ломантнеде арсезь. Пачкодинь, стамбаро эскелязь, шкастонзо. Кшинь уксисця «газелесь» аштесь Сеськенъ Валюшонъ озязонъ пизэшка лавканзо икеле. «Паро, шкастонзо сынъ, пси кши саян!» – кивчкадсь прясон.

Ноцковтыя кенкшенть ды эскельдинь аволь сэрей кенкшалксонть трокс. Нупальнесь тыц пешксе эрва кодамо ярсамопельде. Мезе, кодат ярсамопельть ансяк арасть! Кува ансяк апак путне! Каня истят ульнесь микшнема таркатне эйкакшшкастон ды мейлеяк? Чаво лавсят... Ванность, арсесть мезе рамамс «ламо килограммань кандтница» ветешка од ды сыре ават. Косто неень шкасто муемс цёратнень? Мекс, кона ёнов а варштат, ават?

Эль кенеринь мельган кенкшенть пекстамо, мельган совась, мерть, судодо-судос эртевинь исень «ардыця ялгам» марто.

– Шумбрат! – сельмезэнзэ ванозь, кирнявтсь вельмиця кеняркс ёждонть мизолдыця турван ютксто шумбрачинь арсемась.

Истямо апак сёрмадо лув уле: васенцекс шумбрат-парт арсезэ цёрась авантень, одось – сырентень; теке марто кедь максозо, васняк, сыресь одонтень, аволь мекевлангт, авась – цёрантень. Пшкадинь Натальнень, ды ёвтазенть марто совась мештезэнь лембе налнэ.

– Шумбрачи! – вастовсть вановтонок, ды маринь каршо налксисця сельме, рунгонзо видьстэ кирдиця Наталень пельде: – Содат мезе... Мхы, тень, нолдык чумом – леметь сеске а ледствяи. Эрси...

– Алё, Алексей, – ледствия, талномадонть эль а кокнозь, сурсон мештезэнь невтнезь, лемем Наталень чамас ванозь.

– Содат мезе, Терентий Тимофеевич, мирдем марто ульнесь кортамо: мартонк вастовомс, теевемс седе малавиксэкс. Кода тон арсят? Кодаяк таргонь ютазь, – та-кода нильнезь ёвтынзе тердема валонзо Наталь. – Туи? – ноцковтызе мазыйстэ-валанясто судрызь штадо прянзо.

– Мекс а туи? Туи... Тердеманть кис, Наталь, суюконян, – талнозь, паряк, секс эрязкалезь, ёвтынъ валон, кивчк варштынъ кирьксала, сэнь сельме чамазонзо ды сеске виздезь комавтыя прям.

Наталь шаштсь полканть ваксс, кармась прянзо нолдазь ванномо суликатнень алга аравтнезь микшневиця ярсамотнень. Эскельдинь сонзэ вакска икелев. Пирявксонть тона ёно сонсь Валюш, аволь сэрей, раужо сельме, тюзала чама, эчке, аволь сыре аваломань. «Аволь эрзянь Валюшонъ чамачачозо, – ютась, теке кияк кучизе, превган мелесь. – Тетянзо, аванзо? Косто сынъ цопадизь те тусонть? Муик азё... Сталмонтькак кандтни...»

– Монень кавто кшикопшат, розень, лиякс – раужо, ды ашо, седе чевтине, меринь, кшинь лавканть вановтсон злыдардезь.

Путынъ полиэтиленэнь юдмазон максозь рамавксон, пандыя, сокаринь зепсэнъ, питнест ды лисинь ушов.

Лембе. Чись маней. Чипаесь, сэнь паксятнень азорост, пейдезь пейди. Кецневти виртнень-паксятнень, ломантнень. Маргон лавкав якиця шабратнень вазошка пинест Ашкай. Ёжом вадря, кайксэм седеяк.

Эскелян теке каладырь киванть мекев, кудов. Юткоськак тесэ ютамс кемень минутат. Пильгетне метрат ловить, а аштить таркасост. Превтнеяк а содыть нузякскалемат. Оймсить ансяк удомсто. Вана нейгак: «Кодамо паз чачтызе те мазычинть? Аволь сэрей, седе виде карми – алкине. Валдо, аволь покш чама. Варштат веёндо – таташке. Вайгелезэяк... Чольдерди тундонъ чудикерьксекс. Кеман, серьгеди моро – марясызь удыця пельтнеяк, ломантнеде а мезть кортамс – стувтсызь леместкак».

Течи, вановтом вакска эзь юта, оршазель Наталь лиякс. Ушонть псинзэ лангс апак вано, лангсонзо кувака пильге, валдо-якстере тус понкст, нурька ожа икелень палянтъ полавтызе якстерть-мери, кувака ожа палясо. Мезть илязо кая ланганзо – молить, невтить рунгоь мазы-

чинзэ. Варштат лангозонзо, – мерят, икелеть од тейтерь. Седеяк, зярдэ несак сетнень ютксо, конатне майсевить велькска сталмодост. Кода истя вансты эсь прынзо? Мезде ярсни? Кодат тевть уски-сяворды астакалгадомадо?

Неень шкасто, зярдэ ярсамопельтне – кодат ансяк арасть лавкатнесэ! – сынсь эцитъ кургс, ды, текенень, чинек-венек озадо аштемасть панить эйсэнек тона пелев, косто мекев ки арась. Ванстомс эсь прынтъ – те неень эрямосонтъ ине, менелень сэрсьэ тев, сынъ мельс, Черькаень Наталень ёндо. Виев ломанесь, маряви. Виев сон потмовийсэ, ламо вий, неяви, коськана рунгосонзояк.

Вастымим кузтемпесэ ним, Груня. Лангсонзо ашо балягав, пиже, шожда коцтсто стазь кумажа видьга халат, прызо шержей, черензэ кырга видьга вейкетъстэ керязь, яки штадопрат.

Мизолдозь лангозон ванозь, саизе кедьстэнь кши марто юдманть ды потазь совась кудыкелев. Кодат питнест копшатнень, чевтетъ-аволь – эзь кевксте.

Совинь кардазс, саинь артомань кедьёнксон, артомапель марто кедьгетнень ды лисинь вальмалов. Озынь анокстазь нулька пильге эземнезэнь ды поладыя исяк ушодозь тевем – кудонк икельга пирявксонтъ одс артоманзо. Колмоце кизэ уш эскели, кода васенцеде сэнъстэ ваднекшнинь цицинатнень. Тедеде саинь мель артомс валдо-пижесэ, лиякс ёвтазь, салатонь тюссо.

Артынъ чикуншкасто саезь чокшнес, меельце пелев нильтякадокшнынъ. Пелинь пиземедэ, секс истя панинь. Чинь-чоп кодат ансяк мельть эзимизь содавтне! Арсинь банянь путомадо, яжинь превть, кода ды косто ускомс ярсамопель тувотненень, поремадо башка, сынъ а содыть мезеяк, порить... ансяк кенертъ максомо. Модамартнеяк, кадовсь аламо, таргамат. Кая лововить зяро-кодат мельть чинзэ перть пивтсть-ютасть удемган?

Велень эрицянтъ теვენзэ кая содыть пе? А вечкевкшны вейкесь: сынъ, кудонь-пирень мелявкстнэ, эрва кодат тевтне, ушодксто саезь пес чарыть-велить тутманть перька. Поремс, поремс, поремс... Сон свал улезэ пешксе. Тень туртов топавтовить ламодояк ламо мелявкстне. Ламот эрицянтестэ эрить пекень эрямосо. Сонзэ ловить эрямонь зэмекс. Лия, мельс туиця ёнкстонзо, а содыть, содамскак мелест арась. Оймесь чаво, пештемс сонзэ – те сынст а мелявтовты, а токши, а ризнэвти..

Шкань-шкань лиснесь, сакшнось икелень кичиресэ кедензэ кепсиця аволь сэррей-покш авась, кодамокс ды кода васенцеде неекшния Черькаень Наталень. Икелеяк некшния превсэнъ сонзэ алкине, тейтерькс ёлганя рунгонзо. Ней неия ды мекс-бути аравтыя од килей ваксс. Кода теевемс маргонзо седе содавиксэкс, кортнемс маргонзо седейшкава? Кода истя – кода? Инжекс тердимизь? Тердимизь... Мезе тетъ невак? Истя мерськак: «Таргонь ютазь». Чинть эзизе ёвта. Исяк ульнесь куншкачи. Те, лиси, учома таргонь перть. Учома, ков эно молят!

«Теня, саты течис!» – марямга путынъ пе тевезэнь, стинь эземнестэнь, варштынъ топавтозь тевем лангс, пурнынъ-саинь цёкон, лия кедьёнксон ды совинь мартогост кардазс. Важомеда чим прыдовсь. Манеель. Шканзо коряс лембель. Макссь теемс, кецневтимим, аволь аламо.

## Терентий Тимофеевич

Ошов ардтнемадон мейле ютасть зярья чить. Кудос совсинь чуросто. Котьминь, кода сеедьстэ эрси, кардазсо: лаксинь-инзэдинь, рисовинь, чувтосто керсинь-пильсинь мазыльминеть, някат. Теинь вечкевикс, оймень витиця тевть. Эзинь стувтне ниле пильге лангсо чийницятнедеяк. Мезть кортамс, чуросто кие а соды, кодамо тевсэ сюпав велень эрицясь?

Апак учо панжовсь, чикорк мерсь, кудыкельде кардазс аволь покш-келей лазонь кенкшесь, ды стясь кенкшалкс лангс аволь сэррей, аволь човинейк, кудоютконь халатсонзо Груня.

– Прыдыть теветъ, совак, ломань тенек сась! – пшкадсь тень кузтемпестэ цийница вайгельсэнзэ ды, потазь, глянкадизе мельганзо кенкшентъ.

«Мезе, кодамо ломань, косто, кона ёндо? – чиезь чийсть кевкстемань валтнэ пряудемган кедьёнксон таркаваст путнемстэ. – Совама, эно кода...»

Полавтынь кудыкеле кардазьютконь колошан, панжия стака кудокенкшенть, совинь кудос. Удалцькудонь вальманть каршо стуворнэнтъ эшксэ озадо аштесь, учось, васняк сельмезэнь каятотсь, шержей пря атя. Эскельдинь малав. Асодавиксэсь ливчанысто, аволь атыкс стясь. Венстизе, лангозон кецница вановтсо ванозь, панжадо кедькоморонзо. Тень теия монгак. Вейкенек-вейкенек лангс ванозь, нардевтэ лепштинок кеденек.

– Терентий Тимофеевич. Седеем витьсак, карминдерят тень мереде Тимофеевичень таркас – Теряй леляй. Литературань лемем, текенекс, – Дораень Теряй, – ёвтынзе лемензэ ды кода меремс тензэ апак учонь инжесь. «Теряй леляй, литературань лем... «Истят валт велесэ эрямстон кинь кургстояк эзинь марсе, те мезе-бути од...», – арсезевинь атянтъ кунсолозь.

– Монь лемдекшнимизь, – эзинь кирдеве – пейдезевинь, – Лёхакс, Алексеекс, мерить тень мекс-бути Алё, – ёвтыя пшкалема лемем каршон стядо аштиця аволь сэрей, моньшкан, коськана рунго, аволь монь кондымо парь эчке, атянтень. Явовсть «оякчинь» кедькоморонок. Шаштынъ эземне ды озынь Теряй лелянь каршо.

Сельмензэ атянтъ валдо-сэнтъ. Судозо аволь псакань, кувака, куншкасо будолмине марто. Алце турвазо верцентъ коряс аламнеде эчке, ды теде кургозо мизолдомсто-пейдемстэ тееви авечкевиксэкс. Секс правты мель кургонзо кирдемс пекстазь. Икеле валдо-чопода, ней умок уш конясто човоньс сияждыця шержей черензэ наразь нурькинестэ. Ансяк конянзо вельксэс кадозь веёнов судрязь черьпакшке.

Инжесь оршазь атыкс, лангсонзо куштазь пона, нурька ожа, понкс потс нолдазь панар, раужо, вадрясто, секень вант, керяват, вадяшазь понкст. Сон аволь эчке ловажавтнеде, секс, веёндо ванозь, мерят, од цёра. Лиякс кодаяк, куш аволь келей лавтовонзо лангсо кандтни сизьгемень ветеде ламо иеть. Вана истямокс васенцеде стясь сельмень икелев, совась содавиксэнъ тетрадезэнь Теряй лелям, эли, кода книгасонзо, – Дораень Теряй.

Кортазевинек кода-бути апак учо книгадо-ловномадо. Монень маряви, сюлмавксокс тенень ульнестъ стуворонок вакссо диванось – вень ютавтнема таркам – ды пряпесэнзэ вальмалангось: лангост кода понгсь вачказь кулялопатне, журналтнэ, книгатне. Сынь, бешом, ульнестъ ушодксокс кортамонь кувтантень. Мелезэнь тустъ, кадовсть превезэнь Терентий Тимофеевичень кой-кона мелензэ.

– Истяткак валт пачкоolestъ пилезэнь: мезе, келя, икелень шкатне – галань толга ды раужо навсемкай ведь. Мезень сёрмадомат? Кодамо, келя, превей, васов тердиця-неиця литература? Кодат сёрмадейть? – мерекшнесь вейке «ламонь содыцясь». Сон сестэ истят чаво валтнэнь каршо, ёвтнеманзо коряс, мизолдсь ды тей-тов черькась прясонзо. Талномадонть, мельсэнъ, сайсь вальмалангсто кодамо понгсь книга, панжизе ды сеске путызе мекев. Стакасто лекстясь. Озась седе ёнсто.

А стакаль чарькодемс, икелень аштесь превей, ламонь содыця, текенень, сэтьме, чевте кор, седеень мариця ломань. Истятнэде ней ютксонь, масторсонть, косо теевить ламо чопода, тандавтница тевть, сави видькстамс, ламо а мерят.

– Э-э-э... Сёрмадсть, ды кода сёрмадсть! Жуковский, Вяземский, Пушкин, Лермонтов, Толстой Лев, Чехов Антон, Белинский... А Гомер? А стяко литературань ветицятне XIX пингентъ лемдизь рузонь литературань сырнень пингекс. Келей эскелькст Советэнь властенъ пигстэ теезельть эрзянь литературасонть.

Кулдуркаев Яков, Раптанов Тимофей, Куторкин Андрей, Коломасов Василий, Радаев Василий, Абрамов Кузьма, Ганчин Анатолий, Сульдина Аня, Люлякина Серафима, Рябова Людмила... – каштанчинь кирдэзь Теряй лелям ледстинзе эрзянь ды рузонь ине сёрмадейтнень лемест ды сэрдьксэнь марязь поладызе кортамонзо неень тевтнеде. – Истят лемть, истят литературат, культурань истят тэкшт ды сеске, прок менельстэ прась, книгадонть копорьёнт веляв-тома. Састъ тень кувалма кевкстемат: кие «чумось» ды козонь пачкоди книганть полавтыця, электрониканть, вельде ломанесь. Мезеяк, бешом, лия а теят: наукань ды техникань прогресс. Ломантнень ютксо конёвсо сюлмавкстне полавтовсть телевизорсо, интернетсэ, смартфонсо ды

ляя-лия электроникасо. Ялатеке ламонь кувалма тевесь аволь «техникасонть» – ломаньсэнтъ. Мекс, каня кие а мери ловномо электрононь книгат?

Ёгань Теряй ёвтывзе мелензэ, стакасто лекстысь, оймась.

– Виде теяк, Интернетэсь, «чумодо» явозь, – ине вий. Ансяк муеви се, кона ёвтасы, ков вети сон, киберэсь, ды ков пачтысь ломанень сыменть? – поладынь Теряй лелянь, псистэ кортыцянтъ, валонзо, ёвтыва мелем, максынь питне икеле ёвтазь сювань сталмо валтнэнень.

Терентий Тимофеевич кунсолось, чатьмонсь. Кончтнесь сэнь сельмензэ, ваннось лангозонок, мезе икелензэ. Апак учо пстылязевсь ды пшкадсь тенек, кудонь азортнэнень:

– Алексей ды Груня, вандычинь ютазь садо миненек, учотано. Варштасынк, кода лексетяно, мезде-кода мелявттаном, – мерсь шержей пря инжесь таркастонзо эрязасто стямсто. Витывзе рунгонзо ды поладынзе валонзо: – Зяроце ие уш эрятано Пичелесэ, вейкенек-вейкенек седе малавикстэ а содатано. Кециян, содамо карминь: кудосонк явиде мель, тарка книганть. Ней истямось чуродояк чуросто вастневи... Ловноманть каршо кшнинь пирявкст стявтсть. Лездыть тенень эрицянтнеяк. Ярмактнень, сюпавчинть, пешксе пекенть мельга правтомась кравтызь книганть ломанень ойместэ.

– Сюкпря, Теряй леляй, паро валот ды тердемак кис, сатано апак кавтолдо, – мерсь каршо Груня, коник чиресэ аштезь, эсензэ ды монь пельде.

– Натой тон, Груня, ды мон – чачомань коряс ве велень, аволь тестэнь, те шкас эзинек вастневе. Ильведьксэнтъ витема, – янксезь, теке марто муст-мушт пейдезь, ёвтывзе мелензэ атысь лисемадо икеле, кенкш каршо аштезь. – Те ошсо ломантне явовить векедест-вейкедест, велесэ лият тевтне.

Атысь кортась мартонок, лангозонок ванозь, верьга вайгельть. Чарькодия курокаксто: пилензэ Терентий Тимофеевичень аволь одонь – камажат. Абунгалемс а савкшны, иензэ... эскелить кавксоньгементнес.

...Урядыя книгатнеде-мезтнеде коникем. Седе ламотне кельгсть вальмалангс. Штавтыва тавадксонть. Толонь вельмевтеме, ловномо эзинь карма. Копачинь вельксэнтъ. Конинь сельмень. Удомам ёмась. Прок тандадсь. Теке мерят, кезэрень гректнень Морфий пазост допрок стувтымим.

Кувать майсевтсть эйсэнь моданть лангсо эрямонь зэмеденть кевкстематне, кирдеветь превсэнъ Теряй лелянь марто вастовоманок, мартонзо кортнематне. Ютасть икельган чинь-чоп эвтэзь-чаразь теезь тевтнеде ледстнематне. Поладксокс тенст ледсь мелезэнь лавкасо Наталень неемазо. Гайгезевсь седеень пачк ютыця сонзэ вайгелезэ, ды, койники, ваязь ваинь удомань вечкевикс эрькентень. Удын чинзэ лисемс, прок кулозь.

Истя вана чи мельга чи, ков мельга ков, кеняркст-ризкст, ды а редясак, кода прыдовить неть читне-ковтне, прыдови эрямопингесь. Мезекс сакшны ломанесь моданть лангс, мезень кис, мезень тееме? Ломанесь... А мон? Маней валске чипаенть лисеманзо лангс кецнезь ваноме? Аволь апештевица пекень пештямо? Арась, арась! Ансяк аволь тень кис.

## Казнеть эрсить эрьва кодат...

Сыргозинь. Велень а куш а каш. Груня эйстэнь «васоло», икеле кудосо, улы. Курок сонгак сти.

«Мезестэ ушодомс?» – сельмень апак панжо содавттымим кевкстемась. «Мезть кевкстнят? Каня а содат? – кевкстимим модапотмонь кодамо-бути эчке, гавзара-казямо вайгель. – Васняк, умок содат, пештямат зобнят, симдемак кардазсо оркициянтнень. Ветямат лугалангс, сюлмамак цицигас, симдемак вазтнэнь, каяма, седе котност, саразтнэнень...»

– Теня, саты теть лужалемс! Аволь боярат, – панжинь каракшон, меринь марямга эстенъ ды брикстядия лангстон кизэнь шожда вельксэнтъ пильгепес.

Стинь. Витния мельган таркам. Нарынь. Ютынь шлямо-нардамо. Кельме веднесэ шлия-ёрвалдыя чамам, пансия, теке тенстьсэ тенсия, рунгостон кадовикс удомам. Оршнинь ды лисинь кардазов.

«Аштека, аштека! А тон, атя, арсик, мезе кармат каземе Натальнень вандыде мейле?» – апак учо сыця те мельденть тарск теинь. Теяк. Мекс ансяк – Натальнень? Тувталось кодамо? Чачома чизэ? Аволь. Эно мекс сонензэ? Казьсынек, мезе раматано, Груня марто кавонек пельде. А мезе, бути Наталь лемс анокстамс мазыйстэ сёрмадозь-артозь картыне? Ды стихсэ... Кецневтьса, кеман! Мекс – таго куродымим теке кевкстемась – ансяк Наталь лемс? Кода тень лангс ваномо карми Теряй лелям? Содама текенекс тувталонтъ, мезень кувалма сёрмадозь-кучозь. Арась-арась – те а казне, те някинесэ пакшань налксема.

Монсь казнетнеде истя меревлинь: ве таркасо ботамот, эвтемат! А вечкеви тень те, кадык кезэренъ, коесь. Мекс – а содан. Паряк, нузякчись пильгть путни? Иетнеяк... Мезекс, видеяк? Казне – те максомс лезэ эли теемс мезеяк вечкевикс, важов, мезеяк эрявикс малавиксэть туртов. Сонзэ теемга эряви тувтал: мертяно, урвакстома-мирденень лисема, нурыкинетэ – полыямо. Цётавкс чачома чи – комсеце, колоньгеменце... Весемеде ламо кецневтитъ ломантне вейкест-вейкест Од иень вастома читнетэ ды, секень вант, аволь седе аламо, Авань чистэ. Аватне, видькстамо, казненъ каземанъ кувалт цёратненъ коряс седе дошут. Пшкадема Грунянень. Сон кол нетъ тевтнесэ, профессор...

Каземанъ коесь ульнесъ советтнэнь пингстэяк, ансяк казнетненъ покш – чист, питнет ульнесъ ламоксть лиятат. Аволь кода ней: урныгай – аволь ве миллионь питнесэ, квартира, кудо – кемень этажонъ сэрсьсэ, яхта, океансо усия... Истямо казненъ макснемадо эзь марсева, онстояк эзь некшневе. Сестэяк, содави, эрва мезть вастневсть, ялатеке урныгайс-кудос эзть пачколе. Мик версетнеяк. Казнекс ульнестъ лембе, арсема марто сёрмине, почта вельде кучневикс картыне, патефон, книга, паро, тантей чине ведень флакон, вечкевиксэть туртов мазыйстэ викшнезь пачине. Шкань ютазь паро казнекс лововкшность радиолатне. Максневсть, теде башка, Ленинэнь ды Сталинэнь лемсэ Казненъ лауреатонъ лемть. Мезе ульнесъ – ульнесъ. А велявтсак. Се, ней уш умонь, эрямостонтъ аламо мезе ванстовсь. Аволь весементъ, ламо мезентъ – ванстомаль.

А бути Натальнень паро книга рамамс? Кинь, кодамо авторонь? Косто? Сави ошов ардтнемс. Тевесь эно малавгак аволь тень эйсэ. Мезе ашти монень тов пансемась! Ловныця-аволь? Вана мезде арсема! Казьсак казнеть, сон лангозонзо а варштыяк, усксевеме карми. Мезекс те? Ютазь шкатнетэ книгась ульнесъ, кадык аволь эрванень, паро казнекс. Ютазь шкатнетэ, ней...

Ней? Ней... Седееъ нуваргады: чинь куншкава тол мартояк а муят ловноманъ вечкиця. Ков сынъ ёмасть? Мезе мартост теевсь? Мейсэ тувталось? Визькс – книгась велявтьсь... шукшокс. Чумо телевидениясь? Истя, сави меремс, улияк. Астяко теицязо, кона чарькодекшнлизе, мезес ветясы ломанентъ сонзэ «эйдэзэ», те самай «сэняжа сельмесъ», кудосонзо куломазонзо телевизор эзь кирде.

Кода полавтовсь шкась ды эрямось!

Чикуншка. Кудыкеле каинь пильгстэнь эрва чинь рудазов колошан, совинь тутманъ пештямо. Груня икеле кудосо уютго вадяши пельскоське муськемат. Озынь каршонзо диванс. Кевкстемантъ, конадо арсинь валскенъ перть, кирдинъ превсэнъ, максья вадяшицянтень.

– Теня, содат мезе, вандыде мейле тердимизь инжекс. Чавонь кедть, эйкакшоськак соды, а яксить. Икеле тень кувалма превть яжамс эзь савкшно. Суликантъ зепс ды – чийть! Ней, истя молиндерят, ламот ловтадызь кевень пингень ломанекс. Ютась шкась, зярдэ «валютакс» ульнесъ пельлитрасъ. Ёвтык, мезе анокстама тенек, мезе саема?

– Шожда меремс, саема... – аламось лоткась тей-тов яксевтемеде пси уютгонть Груня, путызе икелензэ «стядо», кепедизе вановтонзо мирдензэ лангс ды ёвтызе мелензэ: – Мертяно, мезеяк оршамопельтнетэ... Содама, кодамо покшолманъ, кодамо тусонь, кодамо лувонь-

модань, коцтонь... Марят? Эли сайсынек кедьгень масторонть. Мезть эйсэнзэ ансяк арасть! Мезе каземс? Кечинень-кечине – ракамонь тевть. Истя ансяк калмамсто явшекшнить. Теке-нень, мольтяно аволь кодамояк юбилейс. А мезть майсеемс. Ардтнят валске Валюшонь лавкав ды рагат покш-ламбамо арбуз. Седе вадря казне, зяро иля вешне, а муят, – превс путымим псиденть кудонь панжадо сиве халатсонзо Груня, поладызе тевензэ.

– Виде! Виде – седе а ков! – серьгединь, теке эйкакш, кецнезь. – Кода тень эзь панжово те – превс эзь саеве? Кие эзизе марсе валмеревксэнтъ: аватнень черест кувакат, а превест... Вана теть нурькинеть! Сень кис яла пря шнатано: минь, минь, цёратне, превейть, докат! Эйтэст вейкенень теяк эзь чулгово – рамамс казнекс арбуз! – шныя, аноколинь «сырнень валонзо» кис Грунянь турвас паламс.

## Вандыде мейле

Э-эх! А шказо уш ниленть трокс кирнявтсь, ашолгадсь. Саты теть сэставтнемс-мерькамс ацамотнень. Зюнзютне учить. Атякшоськак астяко кирьгапарензэ разди, ледстни эседензэ ды зярс чувто лангсо авақштонзо.

Штавтъя лангстон лембе, истямо вечкевикс вельксэнтъ, ащые таркам ды карминь пурнамо-сэрнямо, эсь мельган якамо.

Ушодовсь од, лия чи. Менелень прывтось эрьвела, мизолдыця вановтсо келейстэ вансь вальматнева ды валдонь кельсэнзэ тердсь мартонзо эскелямо, вейсэнъ тевень тееме, тердсь ушов.

Стясь тона кудосо, пурны ацавксонзо, састыне козкстни, васты маней чинть Груняк. Лисинь ушов, сайнь латалдо койме ды ютынъ кудонок удало модамарень пирезэнек. Шказо, таргамат. Чемень сэвинзе лопасть, касомасть касовсь.

Коймем сялгавтан куракшонтъ аламнеде потазь – илязо керяво модарне. Ванан текенекс илязо мараво, вельтяво, илязо кадово модас. Аволь покшт тедеде модамартне. А кона ёндо улемс вадрякс, пиземеть ульнестъ – чемемень сэвинзе. Кенярдт, яла мерить, сенень, мезе ули, мезе пазось макссь.

Коймем ды кедень-пильгень содыть тевест, путыть вий – таргить кастозентъ. Веляв-тови ундокс, омбоце... кеменце... Капши, а кадови чувицятнеде прядемеськак. Эйсэнзэ мельтне кашкить-эвтить пизэсэ коткудавокс. Сынь оймамо а содыть. Ансяк удомсто энгамить. А содыть оймамо Черькайтнеде арсематнеяк. Неемс Наталень, коргнемс Теряй лелянь марто. Сон неаясь, зярдэ сакшность тенек, валонь кирдиця ломанекс, редия теньгак – сон келейстэ ды домкасто арсиця, ламо ловныця. Те истякак содави. Апак ловно, ламонь апак сода аволь романт, ёвтнеминьяк аволь сёрмадо.

Вастовтано – карман седеяк парсте содамонзо. Натальдеяк... Кие сон, кодат содамочинзэ? Косо, мезекс важодсь пенсияв туемадо икеле? Вастовтано – теевтяно, кемеве, седе малавиксэкс. Кие, кода-мезе, те весе... Неемс, варштамс сэнь эрьке сельмезэнзэ, марямс... Вана мезе превстэнь а лисни, вана мезе монень эряви васняк, вана мезе уски, терди тензэ...

Арсеzewинь лия покш тевде – одс вельтямс, кадык зярс аберяньстэ ашти, кудонок, путомс неень шкань лато, келькшсэ вельтязь жестень.

Сась Груня. Комась, кундась мода лангс ливтезь модамартнень кочкамо ды ведрас веркасто кайсеме. Тоцк-тоцк, байк-байк... – маряви кайсемстэст велень келес. Эрязкалезь, теке сараз поксари моданть кавто кедьсэ, иляст кадово модартне модас. Нетькстнэнь ёртни-вырновтни ве таркас.

Тевенек моли увсо. Зярдэ пешкедсть кедьгетне – эйтэст кеменьшка, – сялгия коймем ды ушодынь латалов кандтнемест. Явномадост мейле – видьмекс, ярсамс, рақшатненень – нолдасынек кавто лазсто стазь олаккева мацтс. Молевкс кавто пешксе ведра марто вейке, омбоце,

колмоце... Зяроксть илязо уле, превтне тевест содасызь, пыльгетнеде-кедтнеде косяк а кадовить – мезде ансяк а арсить!

«...Течи прядомальть, ансяк, пелян, а прядовить, вете соткат, аволь аламо. Кажось эно апокш, ванды «съяврдсынек». Мейле рунготнень ёрвалдомат. Сисем часос эряви улемс анокок. «Вастовтано Черькайтнень марто, мейле мезе, мезе седе тов? Мезе, мезеяк арась...» – бизмолдсть прясон кевкстематне.

«Кодамо панар оршан? Маряви, раужо кикс марто ашонтъ, моли тень. Туить куштаз, валдо тус понкстнэяк. А Груня кода пурны-сэрни?» – нурясть, полавтневсть ловажань кудосост мельтне стака ведрам марто тей-тов яксемстэ.

Таго саия кедезэнь койменедентъ, таго карминь сявтнеме нетькстнэнь, бажинь таргамс модамартнень лангс, неявост ды ён улезэ сынст кочкамс. Кочкак, Груня, поксаряк, пешттъ кедьгетнень! Нетъ ансяк валт, сонзэ эзь саво кармавтнемс, тейсь тевензэ те аволь веркатнестэ ломанесь – кияк мельганзо а кенери. Сави шнамс, кол авась пирень-кудонь пень а содыця тевтнесэ. Варма, а мерят, аволь эрязкалицятнеде, тень лангс апак вано, тевентъ теи куроксто ды вадрясто.

Котьминек чикуншкас. Ярсынек-теинек, лекстинек ды, сиземанть изнязь, поладынек ушодозентъ. Телень перть теде-тонадо байтяк эряви, эряви эстенек, ошсо эриця эйкакштнень, аволь аламо эряви кардосо кирдевицятненьгак...

Пе путынек модамарень таргамонь мелявкстнэненъ чивалгоманть якстерьгадома шкастонзо. Чипаесь, кода миньгак, арсесь оймсемадо, арсесь шка максомс экшела менельсэнтъ сюрюкс мендявозь сэняжа муворонтень. Сиземадонть эскелинек Груня марто стамбаро, пыльгень ускозь, ялатеке мелень витезь – теинек чинзэ перть ламо. Молинек чатьмонезь. Кортасть кисэнек мацт лангс кандтнезь ведратне. Пиземеде пелемс а сави, пеледест ламо модаренек лато алот.

## Арсят истя – лиси лиякс

Кудосо шлинек-ёрвалдынек чаманок-кеденек, нардтнинек шлямонькаентъ ваксс эскес понгавтозь чевте нардamosонтъ. Груня шкань апак ёмавтне кундась стуворонь анокстамо. Мон оршнинь кудокс ды озынь коникс, оймсемань вельть вечкиця Нузяй ваксс, а истяко чеертне кудыкельга-кува чийнить ошконсо ды промкст ютавтнить. Педявтыя вановтом кулялопасо теде икеле муезь, мелезэнь туиця статьянтень. Ловнан, лексян-пувсян.

Вальматнень копачинзе вецана сув. Букватне «вишкалгастъ». Кармась сундерьгадомо. Груня вельмевтсь тол.

Эзинь кенере ловномонзо статьям, апак учо вить бокас шоркадимим истямо пштикс, эль эзинь серьгеде пиже-ожо вайгельсэ. «Те таго мезень апкаж?! Истямо сэрдькс вестькак эзимим куроле...» – чиезь ютась прыван.

Кеминь, юты. Стинь. Тарказост, вальмалангс, путынь книган-газетан, ация таркам. Мадинь кунст. Венстинь пыльген. Зярс-бути сэрдьксэсь аламнеде потакшнось. Таго ушодсь карамо. Велявтынъ пеке лангс, оймамо эзь арсе. Видькстынь, мезе мартон, Груняненъ.

– Теня, ютак медичконтень, паряк, ёвты мезеяк, потмом палозь палы, – сэрдьксэнтъ лепштязь, сеедьстэ лексезь меринь ним туртов. Сон мезеяк эзь мере, каясь мезе-бути ланганзо ды лиссь. Кадовинь съкамон. Пштиктнэ седеяк сеедьстэ, капшазь кундасть сялгонеме. Мезе, кодамо тюниха марто ансяк а вастоват эрямосонтъ!

Аволь ламо шкань ютазь келейстэ панжовсь кенкшесь, ды мельга-мельцек совасть велень докторонок Сюватонъ Галя, азоравадонть аламнеде сэрэй, мельганзо Груня. Галя шумбракстнесь, ютась коникем ваксс, стядо аштезь, таргась юдминестэнзэ градусник ды максызе монень – путомс кавалалов.

– Ней ёвтнек, кода ёжот марят, мезе марто теевсь-лисс. Иля эрякале, – мерсь чевте вайгельсэ, чамазон апак кончтне ванозь, прок сельмень ёвтасызь, мезе эйзэнь педясь.

Мон ёвтния, кода-косо маряви сэредьксэсь, зярдо ушодовсь, кона таркасонть, куроли-мем-арась икеле. Ормань очобицям кунсолось, вансь лангозом. Шканзо ютазь таргия градусникенть ды венствия учицянтень. Кандызе сельмензэ малав, арсезевсь ды «кецневтимим» «аппендицит» содавикс валсонть.

– Эряви тердемс капшакай, – ёвтынзе неть валтнэнь, шаштсь аламнеде коникем эйстэ, таргизе юдминестэнзэ телефононзо ды кочкизе эрявикс номерэнтъ.

Монень капшакаень тердемасть, мельганзо каштось пачкодсть кода-бути гонгиязь ды теке каськасто. Пеень сускозь, кониксэнть велявтнезь-менчевезь кирдинь акирдевикс сэредьксэнтъ. Груня ды Галя озасть, аштестъ чатьмонезь.

«Кода монтемень Груня карми прядомост модамартнень – превс а саеви. Мезе съкамонзо теи? Э-э-э, цёра, тонь допрок бриндат новольсть. Тонь каня тоначив сайт эйсэть? Сат. Сат, ды стамбарнэ-стамбарнэ прядсынк. Э-ка! Муить мезде мелявтомс.

...Ванды сисем чассо вастовома Наталья марто. Вастовинь... Кортнинь-калякинъ Терентий Тимофеевич мартояк. Учинь, учинь те часонть! Учовсь... А стяко кортыть: арсят истя – лиси лиякс. Аволь весе эрямосонть ашти эседеть, аволь. Ней зярдо, кода вастовтано? М-хы, пря яжат... Ули телефон. Ули... А косто мусак номерэст? Кодаяк муса...»

...Совасть, талай чокшненть лангс апак вано, нупалентень, козонь путымизь, ашо халатсо, сэрей, ведьгеменьшка иесэ цёра-врач ды почаня пря, эчкела рунго, мизолксонь казниця од тейтерне, медсзорнэ. Содылинъ: те цёрась – Пичелень, фамилиязо Пивцайкин, лемезэ Пётр Иванович.

– Ну, кодат теветь, откерь? Кода ёжот марят, мезе лангс пеняцят? – лангозон ванозь, пшкадсь тень пеедькшнезь, паро ёжосо, ормань очобицясь. Саизе кедьстэнь градусникенть, педявтызе вановтонзо лангозонзо.

– Теня, – лавшо вайгельсэ ушодынъ ёвтнеме ормадон...

Докторось кайсевтимим. Чатьмонезь токшизе-вадяшизе пекеалксом ды мерсь вакссонзо аштиця ашо кавшаня прячерь медсзорнэнтень:

– Нейке, шкань апак усксе, анокстынк операцияс, – ды кавонест вейкест-вейкест мельга лиссть нупальстэнтъ.

Кадовинь съкамон, эсь мелень-арсеман марто. Марсинь, келя, те керсемась-стамось аволь стакатнеде, шождасто тееви ушодыця хирургонтеньгак. Ялатеке эрьва мезть лиснить те «шождаканть» ютавтомстоэяк. Косто а косто саевсь ды совась потмозон кодамо-бути ризк-навола ёжо. Эрьва мезть лиснить... «А! Мезе ули – се ули!» – оймавтнинь эсь прям, кшувавтнинь превстэнь чопода мельтнень.

Сёлмон нолдтнинь стяко.

Нупальтнева валскенъ ютамо шка. Кой. Састыне панжовсь сэрей ашо кенкшесь, ды совась тенек Пётр Иванович ды, кода свал, медсзорось. Эскельдясть коникем пес.

– Ну, кода ёжот марят, откерь? – коникем вакссо стядо аштезь, пеедькшнезь пшкадсь тень исень валсонзо ормань менстицям. Керявксом эзизе варшта. Саизе венстезь кедьстэнь градусникенть ды ютавтызе ланганзо вановтонзо. – Ниле чинь ютазь, цёра, улят кудосо. Сырькаеть вакссо кармат ёжот витнеме. Ансяк, ва, ирдезт иля яжа, стакат иля кепсе, ве таркасо мель путт а аштемс, яксек састыне.

Кунсолынъ ды арсинь: кодамо паро профессия кочкакшнось Пичелень те эрзянь цёрась. Кода а суюконямс сырнень кедензэ кис?

Лездыцязо та-мекс лиссь. Палатантень апак учо кадовинек кавонек. Пётр Иванович озась каршон чаво коникенть чирес ды, кумажанзо лангс нежедезь, лангозон пштистэ ванозь, апак учо кортазевсь допрок лиядо.

– Ванды, содат, таргочи, кочкамот. Кинь кис кармат вайгелеть максомо? – мизолдозь, валаня кемевикс вайгельсэ кевкстимим Пивцайкин. Чатьмонезевсь. Учось, мезе ёвтан.

– Кода кинь? А мезть кортамс, Мештевень, содазь... А мезе? – кониксэнтъ кунст мадезь аштезь, апак арсе ёвтыя, мезе кирдевсь превсэнъ. – Сондензэ, лиянь, а кинь.

– Мон мезеяк а мерян, эрвантъ эсензэ арсеманзо... А мекс аволь Прявтонть кис? Вант, кода мелеть, ансяк монь сядловтсамак, а максындерясак вайгелеть Прявтонть кис. Мерить тень: эзик топавто мерезентъ, тень кис, парсте содат, а шнатадызь. Ярмакт тень-сень рамамс а максить... – нусманясто мерсь мезе мериксэль каршон аштицясь.

Кунсолынь прявт врачонтъ, ды потсон киштсть, невтнестъ сюрост ды пижнестъ ошонь келес вардолевкст: оно, оно кода прявт пурныть, оно кода масторсонок ветявить тевтне – кенгелезь, тандавтнезь, салазь, секс варявт зепенекак...

Саимим седейскириця, нусманя ёжо.

Сеске Пётр Иванович ламо содыцясто, превей, шназь цёрасто теевсь чаво пряпотмо, сэрсь-чамас дёкуш, тудора рунго ломанекс. Лангозонзо ванозь, нусмакадынь, мелем, кой-мезе тензэ ёвтамс, – ёмась. Жаль тень марявсь.

Ломанесь, кадык аволь эрвась, улезэ ломанекс, валдо мельде пешксе пря, ванькс ойме ломанекс, аволь налкшкекс кинь-бути кедьсэ. Яказо сон эрямонь китнева прянь кепедезь, каштанчинь содазь, азорокс. Улевельгак истя...

Кавто-колмо чинь ютазь пшкадинь Пётр Ивановичнень – седе курок, шкадо икеле, нолдавлимым кудов. Грунянь кедьсэ, меринь, прядса пичксемань курсам. Колмоце чистэ, чикуншка малава, окояники, вановтом вастовсь сэнь-пиже коня, валдо сельме кудом марто. Лу-уньк мерсь седеем кенярксонь ёждонть. Исенъ нусманядонть эзь кадово челькинеяк.

Кудо, кадык сон аволь монь лемс сёрмадстозь, путынь эйзэнзэ зняро, зяро сонзэ неень питнезэ. Ялатеке сон кемевикс лато: эжди цят якшамотнеде, вансты юргозь-вешкезь пувиця ушонь ды эрямонь бурятнеде.

– Я! Те тон кода шкадо икеле? – эль кенеринь мельган кудонь стака кенкшентъ пекстамо, vastымим Грунянь човине-сэрей вайгелезэ, эскельдьясь каршон. – Мерекшнить, вандыде мейле нолдатадызь.

– Истя уш лиссь, – эзинь карма ёвтнеме, кода-мезе ульнесь педес-пес.

Оршнинь одс, ды совинек Груня марто икеле кудос, озынек чевте диванс.

– Кода прят марят? Ёнсто ютась керсемась-стамось? Лия мезеяк эзь керя? – пеедькшнезь кевкстимим Груня. Озась седе ёнсто, нежедизе кутьмерензэ диванонь удалксонтень, учось.

– Теня, эзинь маря, эряви варштамс... – Грунякс пеедькшнезь меринь кевкстнеманзо каршо.

Ёвтния педес-пес, кода ульнесь.

– Пекеть вачсь? Ярсамо кармат? Оно мезе, – кепедизе, «оно»-ть лангс лепштызь, вайгелензэ, юхадсь вить кедьсэнзэ мештензэ икелльга Груня, – гайневтсь Терентий Тимофеевич. Кевкстнесь, мекс эзинец сакшно тенст, кода кортазель, инжекс. Ёвтыя тувталонть. Истямо мель ёвтась: садо, зярдс савтадо. Максые телефононь номерэнзэ. Оно, вальмалангсо конёвпанкс-кесэнтъ. Мусак. Икелест, видькстан, чумо теинь – эзинь гайневте асамодонок, – паро кулянь ёвтыцясь сурсонзо нардынзе турванзо, стакасто, виень путозь витемтизе рунгонзо ды ютась удалце кудов.

– Паро, колмо-ниле чинь ютазь варштатано, – меринь дивансто стямсто ды эскельдинь Груня мельга. Мария, пекем каравсь, ледстни пештемадо. Озынь свалшкань озамо тарказон стувор экшс. Учан.

«Эрь эно, стяко пелинь, стяко мелявтынь, – арсезевинь, – лиссь кортазентъ коряс, читне ансяк аламнеде паштовсть. Мезе теде полавтовсь? Сяк пазонтень, Везувий одс эзь вельме, Равгак пелеве ёнов чудеме а арси. Колмо-ниле чинь ютазь уल्याно Черькаень кедьсэ. Содамс, кода оршазь вастсамизь Наталь? Пароль, кода сестэ, васенцеде вастовомстонок, – нурька пильге, чопода-сэнь човине коцтонь понкст, сэняжа тюс, теке менелесь, ожавтомо ковтыне. Те уш кода пазось мери. Инентъ а кармавтсак».

## Вана сон кодамо, Наталь!

Пичепев од содавиксэнек туртов молемадонок икеле лиссь вана кодамо тев.

Шумбрачинь кудосто самодон мейле омбоце чистэ, чикуншкань ютазь, совась тенек апак учонь, киде зрядояк арсезьгак арасель, инже – Вельдяень Ирина, Пичелень библиотекаресь, свал ков-бути капшиця, верка, теке штере авась. Паряк, секс истямо коськанаяк? Оршамотне лыйнить лангсонзо.

– Шумбратадо, Паксютт! – ансяк кенерсь совамо, киякссто потолокс пештизе кудопот-монть жойница ванькс вайгельсэнзэ. – Кода эрятадо-аштетядо? Тевенк молить, мезе лангскак а пеняцятадо?

Аванть аволь книгань-библиотекань кевкстнемадонзо васня талакадынек. Те кода истя, кевкстни – теке Сюватонь Галя медичкась. Меремс мезеяк эзинек мере. «Пеняцямодо» чаво валонзо ютавтынек пиле вакска.

Иричанень ведьгеменьшка. Минек коряс од ломань. Сыретнень юткс а совавтсак. Седеяк – лангс ванозь. Кодамокс иляк лово, эрязачинзэ лангс ванозь сьвадыть ламонь сельмть. Моли – мельганзо чиезь а кенерят. Секс сонензэ пароль улемс аволь книгань азоравакс, а сёрмань-кулялопань кандтницякс. «Кунсолока, атя, паряк, неень библиотекартненень улемак Иричань кондямок?! Чийнемс, а мезть нувсемс книгатнень марто чаво нупальсэнтъ».

– Ютак икелев. Озак, прякан варчить, – сэрей-сорныця вайгельсэнзэ тердизе Груня совицянтъ. Оно, невтсь панжадо коморсонзо стуворонть, вакссонзо чаво эземнентъ ёнов.

– Арась, арась, Груня патяй! Сюкпря, шам арась, – эрязкалезь, прясонзо сеедьстэ чертязь, мештензэ икеле сеедьстэ ахолязь, ёвтызе мелензэ Ирина, кудокуншкасо стядо аштезь. – Мон вана «Валдо» журналонь од номер тенк кандынь. Кеман, Алё лелянь кецявтса! Сон велесэнек весемеде виев книгань «порицясь». Номерсэнтъ ёвтневи минек велень авадо – Черькаень Натальде. Тынь, Груня патяй ды Алё леляй, аволь минек велень, содасынк сонзэ, а маняван, чультъ-чальть. Секс ловносынк сёрмадовксонтъ паро мельсэ.

Мон аватнень юткс, мезде-кода кортазевсть, эзинь эцне, чатьмонезь аштинь стувор эхшэ ды састыне «варчинь» Грунянь модамарень истямо кавшаня ды чевте-тантей панжакаензэ. Сускат – келеть нильсак.

Иричань кургсто марязь кавто валтнэде, кецнемадонть эль эзинь кирнявто потолокс, кивчкадсь, югась пачкан мезе-бути ёндогонь кондымо. Мон стинь, автордыя аванть кедьстэ журналонтъ ды озынь «ловнома тарказон», мелень ванозь, монськак а содан мезде пелезь, панжия ансяк кандозь «Валдонть». Вельксэзэ-лангозо теезь мазыйстэ, кода кортыть, танстень марязь, – ваны лангозот сэнъяжа-ашо тусонь фотокувостонтъ эрзякс оршазь мазый – сельметь а саевить – ава. Нолдык чумом, «Валдо», талай эзитинь сайне кедезэнь.

Варштынъ ёнкскентень, кинь сёрмадовксост номерсэнтъ. Кузьмин Григорий, Тимофеев Алексей, Пахомов Яков, Василий Ёндол, Радай Васильев... Содавикст, содавикст! Те сын 30-це иетнестэ ульнестъ юронь пугыцякс эрзянь литературанть, сын теекшнизь ашождыне васень эскелкстнэнь. Кода эно, вечкевикс сёрмадеень! Кода а содамс ды а вечкемс масторонтъ келес содавикс «Кенгелькай» романонтъ авторонзо Колмомасовонь? Сисемеце классо тонавтнемстэ эрвантень, кие мезеяк а истя ёвтыль, раксезь-згилязь мерилик «кенгелькай». О-ох, кода те умок ульнесь, кода васов кадовсть сеть шкатне!

Пачкодинъ, лемтнень ды сёрмадовкстнэнь ваннозь, Сыреськина Раиса видьс. Те сон кодызе-сёрмадызе «Авань мазычи» фотокуво марто покш статьянтъ. Сонзэ кедьчелькесь! Панжия невтевикс ёнкскентъ ды сельмень эртевсть... Наталень ёнкскентъ келесэ покш фотопортретс!

Ловныя Райань шкинемань видевоксэнзэ весть лекстызь, ютынъ омбоцедэ. Берянь мезеяк а мерят, парсте, сюпав кельсэ викшнизэ Раюш статьянзо. Ве таркасонть – покш абзац – ёвтневи

откерьяванть рунгонь-чамань мазычидензэ: «...рунгозо – а эрьва тейтернень сави шнамс пря – тундонь од килей, вановтозо – пицезь пицесы седееть, чамасонзо мизолксось сияждозь сияжды...».

Видестэ, петнявксень пес видестэ невтизе. Ансяк теде, видькстан, ловномс монень а мезть. Неия, латынень кельсэ мерезь, в натуре, аволь кодамояк алкинепитнень артовкссто. Аволь ансяк неия, вана нейгак гайгезь гайги пилесэнь сырнень вайгелезэ.

Таркань ютазь сёрмадыцясь ёвтни Наталень ошсо ды велесэ кудуютоконь, кардазонь ды пирень ламодояк ламо мелявкстонзо. Уски сынст, кода сёрмады Рая-Раиса, – лишмекс. Те уш, монень маряви, вельть казямосто – лишмекс. Эряволь седе чевтинестэ. Теке марто журналось теньсэ невтизе аволь ансяк Наталень мазычинзэ, невтизе тевень вечкиця-теиця ломанекс. Сонзэ кунсолыть цёрань тевтнеяк, кунсолыть узересь, инксэсь, пилась, мушкорось... Тевтеме, диван лангсо лужалемань эрямось – аволь сонзэ, те аволь эрямо.

Эзия редя, зярдэ выр-выр тусь Ирина, мельганзо састыне панжизе кенкшенть, лиссь эмежпирев Груня, мон яла а явован Иричань истямо тень питней казнензэ марто.

Пекстыя журналонтэ. Кедьсэнь сонзэ кирдезь, сельмень конязь, зярс-бути аштинь озадо таркасон. Арсинь. Арсинь ловнозdentь, статьянтэ кельдензэ, Натальде... Ней сатано тенст аволь кода веёндонь ломанть, а кода талай шкань содыцяст. Тенень лездасть «Валдо» журналось ды Вельдяень Ирина.

## Арсеzesь топавтовсь

Сынек шкастонзо, кода коргазель Терентий Тимофеевич марто. Чокшнень сисем чассо лоткавтэя «автом» кавтов панжтневиця, тень аламнеде содавикс, кшнинь келей кенкшенть икелев.

– Вана тесэ, пиже пацясо копачазь неть пичетнень ало, эрять-нежедить Теряй атя ды низэ Наталь, – меринь мекс-бути салава талнозь Грунянень, ансяк лисинек урныгайстонть. – Тесэ сын, прок письмарт, ютавтнить лембе шкатнень. Те таргавкшны чадыковсто ожоковс. Тунда сыть, пизэ пурныть, экшенди – стить, кода нармунть, сёлмо лангс ды сайть ки лембе ёнов, ошов.

Панжия потмо ёндо тулодозь сэнэ кенкшенть, ды совинек азортнэнь «масторс». Сыргинек пиренть кувалт видьстэ таргавозь, лугасо вельтязь янганть кудынест ёнов. Пирест пелеве ёно, песэнзэ, – ветешка-котошка иесэ пичинеть. Удалост, сеске пиренть тона ёно, прок тетяст-аваст, – свал пиже, пондакш пря сыредяк сыре пичеть. Сын ванстыть пелевеёнксонь кежей варматнеде аволь ансяк эйдест, од пичинетнень, ванстыть пиренть куншкасо оно се чувтонь кудынесэнтэ эрицятненьгак, Черькайтнень.

Яннэнтэ, кува Груня марто эскелятанэ мельцек-мельцек, кавто ёндо пирить васня инзэнь тусто куракшт, мельгаст – шукшторовт, торлат. Сынст удалга, керш ёнга, – аволь сыре умарьчувтт. Сынст мазылгавтыть ожола, пиже, якстере умарть. Те тешкс азортнэнь, васняк, кеман, Наталень, мелявксчидест. Ве аэрявикс, зыян тикшине а неят – косо лездезь, косо мелень путозь чупонезь-изазь.

– Неят?.. – састо эскелязь, тей-тов ваннозь, марямга, прок экскурссиянь ветница, пшкадинь Грунянень, ахолдынь керш кедьсэнь умарьчувтнэнь пелев.

Умарьков. Ушосонтэ општ. Маней. Менелень сэньштесь, маряви, салавине, эль марямга гайги. А неят пельпакшке. А рестыця пси, а экше, кодамо эрси те шкастонть. А сеськетэ, а карвот. Певтеме мазычи ды медьарвонь чине кошт. Лексят лексевлить! «Мекс, мекс тенек свал мезеяк ды а саты, мекс свал маряви тесь-тонась аламо, мекс а содатано пештявома? Валдочама чить, сэрей вирть, келей паксят, сэнэ сельме лейть-эрькетэ, морят-океант, пандот... Весе сын минек... Эряк, кецнек, морак! Мезе тенек невак эряви? Топодтяно-арась зярдояк?» – арсезевинь, седеем колавсь тувталтомо.

– Неян, – нурька чатьмонемадо мейле прась Грунянь кургсто, теке пупордясь, валось. Мелезэ кортамс арасель – ваннось, мезе касы-кастови перьканзо, велявтнесь пряно тей-тов.

Терентий Тимофеевич ды низэ Наталь аштеть озадо кузтемпень лато ало. Неявьсь, учьось. Редимизь, стясть, лангозонок ванозь ды эсь ютковаст мезде-бути кортазь.

– Шумбрачи, шумбрачи! – каятотсь човор, азортнень ды минек пельде.

Теряй лелям венстизе вить кедензэ монень, паро мельсэ лепштинок кедьлапанок, сэнть сельмесэнзэ цитнеть кеняркс ёжонь сяткинеть. Нолдызе кедем ды парсте марямга, прок ушман, яволятсь:

– Мон тынк кедьсэ ульнинь. Секскак содавтневемс а мезть, Теряй атянь содасынк. Тыненк Груня марто мон саван лелякс, секс тынсь чарькодьсынк, кода тень пшкалемс. Покштянь-сырькаень койтнень эрявить ванстомс, – паро ёжосо, мизолдозь, макссь тенек, одтнень сонзэ коряс, превть

– А мон – Черькаень Наталь, тетялемем – Викторовна. Саван кавоненк туртов, кода маринь, кирдажокс, – пеедькшнезь содавтызе эсь пряно азоровась, теке мель путсь невтемс ашо, цитница вейкеть пеензэ. – Паро, теевинек, окоиники, седе малавиксэкс. Мон те велень, ансяк пенсияс туемазон сакшнын аволь сеedyстэ, сакшнын авань варштамо. Шкань ютазь ... Ну, те уш лия моро.

– Монень чачома чистэнь саезь мерить Груня. Минь Теряй лелянь марто ве велень, аволь Пичелень. Мелявксонк, кода велень эрицятнень весень: ботатано чоподасто чоподас, пе а содатано, кудосо-кардазсо, лембе шкатнестэ – пиресэ. Лисни, минь Алё марто – алкуксонь велень эрицят, – чамдызе потмонзо ним, кузтемпесэ Наталень каршо аштеть.

Колмо-ниле валт ёвтынть эседень, Алё-Алексейде. А вечкеви, зярдэ тень истя пшкадить. Мекс – а содан.

– Мезе, аядо кудос, – апак учо каятотсь, шаштынзе веёнов содавтомато кортамотнень, Теряй лелянь чевте, вечкевикс вайгелезэ. Корты сэтместэ, кунсолыцяно марязь. Бути кодамояк пелькстамо, ушоды кортамо, мезень редия невак икеле вастовомстонок, псистэ ды кемевтезь, а поты, мерезенть а полавтсы.

– Ужо, атя, иля капшавто, – сорновтызе раужосто артозь прячерензэ, сертизе поланзо азоровась, – аядо васня, инжеть, невтьса тенк, пря шнан, «эмежуманок».

Теряй лелям мезеяз эзь мере. Озась удалонзо эземнентень. Монькак арасель мелем, каня эсенек пурькатне-якстерькатне лият? Седе ён, седе мель витевель кадовомс теске. Арась, тень ловия мелень аваномакс. Секс апак капша, перькан ваннозь, увол-авол сыргинь Груня ды Наталь мельга.

Валтнень ёвтазь, Наталь саимизь – сонсь икелев, теке экскурсиянь паро ветиця, – кудонтэ тона ёнов, икелев, косо кастовсть эмежензэ – эмежпирев. Састо, киртязь эскедьксэ эскелясь пандятнень юткова, сонсь, кедьсэнзэ тей-тов невтнеть, лодорсо, паро кайксэ-мельсэ ёвтнеть пирень путовкстонзо.

Ёвтнеть, кодат парт тедеде ульнеть чурьканзо, лепиякшнозь ёвтнеть ожолгадыця помидордонзо, пурькадонзо, таргазь модамардензэ. Лия ёвтнема ютавтсь куяртнэде.

Эмежтнеде «экскурсиясь» прыдовсь. Ветицязо саимизь «эрькензэ» ваномо. Те – кемешка-кеветешка метрань келесэ-кувалмосо, метрань сэрсьсэ ведте пешксе чувовкс.

– Ведезэ, нетядо, чемень тюжа. Маштови ансяк валномс. Теяк паро. Ялатеке эйсэнзэ калтнень эрямс маштови. Эрить. – Тень эйсэ ванноманок прыдовсь. – А ней, оят-ялгат, – ахолдась «эмежумань» прявтось кедьсэнзэ, – аядо варштадо эрямо пизэзэнек...

Якинь аватнень марто пандяюткотнева ды превстэнь эзь лисне мелесь: мекс минек эмежень, умарень кастомань профессиясь васенце таркасо ды весемеде вечкевикс? Ламотнень-ламотнень туртов модасо котьмамось – васень те. Артист – превсэнтэ эмежть, инжеер – эмежть, седеень хирург – эмежть, тонавтыця – эмежть... Мик балеринак – эмежть! Логигань коряс эряволь тенек копачамс планетанть модамарьсэ, помидорсо, куярсэ, чурькасо, кап-

стасо... Тень таркас усктано сынст Египетстэ, Израильстэ, Мексикасто, Белорусиясто, Грециясто ....

Те кода истя? Месэ тувталось? Вейкенсьэ: вельть ламот – «агрономт». Кастыть эмежть сеть, кить «эмеж» валонтькак а содасызь. А содыть, кона ёндо модас озавтомс чурьканть. Эрьвась эсензэ тебензэ кода эряви топавтозо! Балеринаськак... Фараонтнень пингстэ саезь ульнесть сюронь кастыцят, кевень таргицят, кевень лаксицят, кепсицят, путницят...Истя вана! Истя апак явно, зярдояк Эфиопсонь пирамидась, Модамасторонь дюниясь, путозь зярдояк аволь уле.

Теряй атя нучказы аштесь таркасонзо. Арсесь. Оймсесь. Учось самонок.

Кайсинек кузтемпень икелев карсеманок ды азораванть мельга мельцек-мельцек сядявксенть ланга, колмо-ниле чалгавкстнень изнязь, кузинек-совинек кудыкелев.

– Вана тесэ, – чольдердсь, сизема эзь сода, Наталень вайгелезэ, ахолдась кедьсэнзэ керш ёнов, – кода поладкс кудонтень – баня. А вана эрямо пизэнекак, – панжизе ожола-тюжа покш-сэрей кудокенкшенть.

Совинек кудос.

«Алкуккак «пизэ», – арсезевинь, зярдэ эскельдинь лиятнень марто кенкшалксонть трокс «зепешка» нупальс. Кельгсть эйсэнзэ: керш ёно – диван ды мельганзо стуворнэ, вить ёно – голландка ды кезэрень пингень апак лотксе урныця кельмонькай. – Велявтомс а косо. Кода эрить?» Икельце кудоськак теке – пештешка. «Кода эрить?» – эзь лисне превстэнь.

Икельце кудонь каршо стенасонть Наталень раужо-ашо покш портретэнзэ. Вейке фотокувосонть сон балеринань оршамосо, теи балетэнь па. Фототнеде башка, мезть ансяк арасть понгавтнезь стенаванть: театрань ташто афишат, грамотат, газетасто керсевкст... Пианинанть лангсо част, книгат, покш ваза, конёвонь кувта, бальцянонь кечине, ашо илевстэ мазыйстэ кодазь кептерь...

– А ней, инжеть, – стувор экшс! – кармавтыця жой вайгельсэ мерсь Наталь, ансяк прыдызе ёвтнеманзо кудочидензэ.

Ютынек удалце кудос. Мерсь озамс таркаваст аравтнезь эземнетнес. Калдор-калдор ойсинек.

Груня – стуворнэнь тона пес, келей вальманть икелев. Сонзэ каршо – мон. Теряй атя – монь вакс. Наталь эзь оза. Сон азорава. Удалонзо плитанть лангсто саизе рестаь модамарь пачалгонть ды путызе стуворонть куншкас. Кельмонькайстэ таргась салатто пешксе вакан.

Те «вакандонть» кой-мезе лия ёвтама. Эйсэнзэ ве таркас керсезь кенерезь помидорт, куярт ды чурькат, аламнеде почодовить салсо, каяви майонез эли чиньжарамой. Парсте човорямодо мейле ярсамось анок. Груня лездась керсемс кши, печтькетнень вачкинзе вакашкес, таркаваст путнинзе пенчтнень. Кодамо ава а муи эстензэ стуворэкшень тев? Салатось – монь вечкевикс ярсамопелем. Маряви, сондензэ тантей мезеяк арась. Порян... Теке теде содась Наталь!

– Эряволь куш пенчкень-пенчкень, – Теряй атя кепедизе прынзо стуворонть вельксэ лавсиненть ёнов, тов, косо кирдевить зярья соргонь чаракавтыця ведтне.

– Минь тонь марто, атя, коське кургот, Алёяк Груня марто, содан, истятнэде. Сестэ кинень нуртямс? Стуворонокак аволь неень шкань, пепсить-мепсить эйсэнзэ арасть. Весе эсенек. Экологически, кода ней кортыть, ванькст, – ливтнесь стуворонть велькска Наталень гайгиця вайгелезэ, «пенчкень-пенчкень» мелесь яволявтозель аэрявиксэкс ды шаштозель веёнов.

Истя тантейстэ, мик мазыйстэ, рестаь модамарде, монень марявьсь, зярдояк эзинь ярсне. Теке Груня истят зярдояк эзь рестне. Пачалгось, ванан, чамсь курокто. Лисни, тусть аволь ансяк монь мельс.

Ярсамонь кирдась прыдовсь. Наталь урядынзе стувор лангсто кедьгетнень ды ушодокшонь кофень кайсеме. Ушодксонть колыя мон.

– Ужо, иля капша, – кепедия кедем ды кардыя сонзэ, мезеньгак лиянь апак ёвта, меринь аламос учомс. Чатьмонезь стинь таркастон ды эрязкалезь лисинь ушов, ношкстынь «Нивам» ёнов.

Курок велявтынь. Эль-эль панжия кенкшенть ды совинь кудос. Мештезэнь лепштызь, кавто кедьсэ кирдинь покш арбуз. Путия, сеedyстэ лексезь, стака канстом вальманть каршо келей эзементень. Тестэ сеске путыксэлия стувор лангс. Эзь лисе. Савсь путомс мекев ды озамс тарказон.

– Ужо, ужо... – кардымим азоравась. Сонсь куроксто совавтсь кудыкельде покш вакан ды путызе стувор лангс, таргась покш пеель. – Ней тев тонеть, Алё!

«Ну и штере, – арсезевинь Натальде, – эрва ков кенери! Палозь палыть тевтне кедьс-энзэ».

Стинь таркастон, путия пиже покш оскам совавтозь ваканонтень, прок пизэс, саия анокстазь пееленть ды керсия ламбамо потьмеж умаренть палонь-пал. Ярсынек ды апак эрязкале кортнинек эсенек юткова теде-тонадо. Шкань-шкань та-кода салава кепсия вановтом мельганок яксиця Наталь лангс. Лангсонзоль, мезесь вельмевтсь мештесэнь кецневтиця ёжот, се сэняжа нурыка ожа, ансяк лавтовонь копачиця, ковтась.

Апак учо сыргозсь потсон стихень ловномань толгам. Витемтия рунгом, кепедия вить кедем мештем икелев ды талнозь, каршон вальманть лангс ванозь, пшкадинь Есенинэнь валсо:

А янксян, а тердян, а авардян,  
Пингем тусь, прок валскень стямсто сув.  
Сёксень поекс пизем ало тардян —  
Мештесэм ней аволь тундонь увт.

Тон ней састо веренть сангам пансят  
Кельмсэ чавозь, пужозь седеем.  
Ды а тердить эйсэм лаймот-паксят  
Кепе чийнемс ней арась мелем... —

прядынь меельце валтнэнь ды мария, кодамо стака канст талномадонть каинь лавтовон лангсто. Чамам палсь. Кедем эль неямга сорность. Теке марто, совасть эйзэнь вечкевикс ёжот. Прядовсь ловномам талаень каштсо ды сеске цяпамосо. Теряй атя эсь мелензэ нурыкинестэ ёвтнизе Есениндэ, сонзэ шкинеадонзо.

Эзень арсе, превскак эзь совсе, эзимем содавтнея мелесь: Наталь апак учо, вана ней, кази тень истямо седейс педтця, астувтовиця казне.

– Мельвановикс инжеть, Алё ды Груня, ледстнемакс течинь чиденть мелем поладомс Есенинэнь. Алё ёвтнесь поэттэнтень стихсэ, Теряй лелям пачтясь тенек шкинемадонзо, мон, прынь мельс, поладомс моросо

Вальмам вельссэ ковань. Вальмам ало варма.  
Сиянь тус тополесь штапьяскадомо кармась.

Гармониясь ризнэзь васоло аварди,  
Нусманя вайгелесь веленть песэ тарди...

Кунсолынь, мерян видьстэ, апак згиля, кургонь автезь. Истямо ванькс, сэрей, истямо чольдеркай вайгель марсемс тень эзь савкшно, прянь апак шна, радиостояк. Прядызе Наталь морамонзо, озась, талномадонть, марявсь, кундатось келезэ, зярс-бути чатьмонезевсь. Нусманя моронть лувозо, менельга ливтница вайгелесь яла гайгсь прыудемсэнть.

Кода сеедьстэ эрси, аватнень кортамонь темаст аволь чуросто эрси вейке: эмежть, умарть, пиреть, оршамот, ярсамопельть, питнеть..., цёратнень – лия.

Лисинек Теряй лелянь марто кузтемпес. Озынек тесэ свал кирдевиця эзементень. Чись эскелясь прядовома ёнов. Перьканок васолга-кува чатьмонезь чарасть сундерькст. Опаня. Каршонок маралякс аштиця пичетне аштить, сорк а теить, теке учить мезе-бути покш, мелень топавтыця. Кортамонок мольсь васняк масторонок, покш масторонок каладомадо, СССР-нь ёмамодо. Покш мель явинек, мекс чикор-лакор молить ве кудосо, ве семиясо эрямонь тевтне, мекс явицятнеде полициятнень коряс седе ламо, мекс ламо урозэйкакшт... Талновтсь Теряй лелянь, кода моньгак, эрзянь келенть резэма ормазо. «Кие чумось? Мезе теемс?» – кевкстематне сизесть каршо валонь учомадонть.

Тедэ-тонадо кортамонок мольсь, зярс чипаесь эзь кекше чополгадыця виренть тона ёнов ды эзь эскельдя седе малав сэтьме чокшнесь.

## Уле ушодкс ды уле-уле пе

Кизэнь се маней лембе чокшнесь умок теевсь астувтовиця ледстекмакс се вастовомадонть. Ютасть кменьшка, паряк, седеяк ламо иеть. Ламо ведь чудсь лейтнева. Ламо эрва кодамо тусонь ды парцунонь пельть сиземань апак сода уйсть Пичеле велькска. Ансяк сынсь содасть, мезде арсесть ды кодамо тевень тееме капшасть.

«Мезе полавтовсь эрямосонок Черькайтнень кедьсэ улемадонок, се опаня чокшненть ютазь?» – шкань-шкань совси прязон кевкстемась, совси монь апак кевкстне. Мезть кевкстнемс? Мезе ульнесь – ульнесь. А ёртсак.

Полавтовсь ламо мезе. Васняк, содави, кмень-кеветее иес сырединек. Тедэ а кекшат. Эрямонок Груня марто кода ульнесь, истя кадовсь. Кудонь-кардазонь ды пирень тевтне мольсть эсест киява, седе ламо, сеедьстэ – каштмолезь. Теезель, мерян апак покшкавтне, ютазь шканть перть аволь аламо.

Ветявтынек газ. Калавтнинек каштомонок. Сонзэ таркас теинь лия нупальне – пидемапанема, ярсамо ужине. Копачинек ташто, сыредеяк сыре кудочапонть пластикень валдо лазсо, сайдинг мерить тензэ. Вельтинек кудолатонок сэнъ жесьсэ... Саты, маряви. Кая зняро иень перть «изнявксонь» педэ-пес ледствявить? Теяк, кинень сынъ, неть «свордозь» тевтне, эривить, лиянень, кинень?

Ней икельганок поркснезь асфальтонь кияванть эрва эскелицясь киртясынзе эскелксэнзэ, полгарьгавтсынзе сельмензэ сэнъ-валдо, сэнъ-пиже кельсэ кортыця «дворецэнек» лангс. Те вечкеви, рашты потсон валдо, кенярксонь мельть-арсемат. Эно кода эрямс, шешкемс мода кеняркстомо? Мезень кис сакшномс эрямонь паксянтень? Удомо ды пекень пештеме?

Кмень-кеветее иень телетне-кизэтне челькевтеме эзть юта эсенек ютксоак. Мон ды Паксютонь Груня теевинек вейкенек-вейкенек туртов седеяк лездыця, седеяк чарькодиця ялгакс. Бажинек стака шкатнестэ аравтомс вейкесь омбоцентень лавтов. Истя, тевсэ-мелявкссо, кеняркссо-ризкссэ, кивчк ютасть, теевсть ледстнемакс аволь аламо иетне.

Черькайтнень арась урныгаест. Арасель сеть иетнестэяк. Сонтемензэ, содавикс тевесь, – стака. Те кода умонь шкатнестэ кадовомак лишмевтеме. Истятнень ломанькс эзть лово велесэнтъ. Секс Черькайтненень, васняк Натальнень, аволь чуросто эривкшнынъ: тень ускомс, тонань...

Саемс тунда ошсто велев самонть. Ярсамопельть ускома, эрва кодат курмот-кармот, сынъгак эривить... Таштавить аволь аламо. Ардт, ускомат... А редясак, прядови якстере кизэсь, мельганзо, ванат, бизмолды, тарка вешни, сёксесь. Аламонь-аламонь анокстама ошов, телень кудов. Мелявкстнеде прявелькска! Пурнамат, ильямат: чурькат, модамарть, помидорт, умарть, торлат, эрва мезе марто эрва кодат банкат... Ведьгемень вайгельпетнень истямо канст марто а эскелясь. Лишмесэяк, кода икеле, а ускыть. Ёмасть сетнеяк. Эряви мезеяк

сынст полавтыця. Монь – «Нива». Мезе седе вадря? Аволь урныгай – пача, эрва кува юты, ускияк... Аволь весть, аволь кавкстькак эмежень-умарень кансттнэнь, тундонсетнеде башка, «кандтнесь» лишмень вийсэнзэ «теленъ кудов» самай те урныгаесь.

Седе сеедьстэ Наталь марто – эряволь меремс Наталь патяй, сон кеменьшка иеде, тагояк ледстяса, мондень покш – ардтнинек кизэнь куншка, кстыень кенерема шкасто, Валдайвелев, буйкуншкань найманов.

А содан мекс, «патяй» валось удемезэнь совамо эзь капша. Мекс – а содан... Мекевлангт, сон айгсь, васолгавтсь эйстэнь аванть. «Кодамоаяк а патяй!» – сеересь мештесэнь кодамо-бути кольнякай вайгель. Тевесь, бешом, аволь свал ансяк иетнесэ. Улить ёнкст, ёжот, онкст, конатне сынст лангс а вануть.

Талай эзь чулгово тень, мекс те лемесь монь иетнень а кунсолы, сеедьстэ совси пряуде-мезэнь, мукшны эстензэ лембе таркине ды бизны эйсэнзэ, теке чаво кедьгес понгозь промо.

Шкань ютазь панжия тувталонтъ...

Кувать кандтнинь, усксинь, лездынъ мейсэ маштынъ «Нивасо» вакссон ардтницянтень, те, монень марявсь, моданть-масторонть лангсо весемедэ мазый-гайгиця лементень, чаман-тень, рунгонть вейкенъ кис – сон эрясь седейсэнь эсензэ сэтьме эрямосо.

Ламоксть ардтнинек мартонзо ошов, седеяк ламоксть – найманов ды лияв-ков. Зяроксть? Каня ловови! Ды, мерема, тевесь тень эйсэ? Мельсэнъкак арасель – ловомс. Уксинек мезе эряви ошов, мезе эряви, сеедьстэ кой-кодат ярсамопельть, – ошсто велев. Вечкевсь мартонзо ардтнемс, мель витсь, мезеяк а мерян.

Велеванть, эзь саво учомс, ёвтасть тень, срадсть-якасть лисьмалангонъ келят-мелят. Истя-истя, келя, Паксютонъ Алё-Алексей, мазый кудонъ теицясь, Черькай Наталь марто тап-севи. Мезть ансяк эзть мендеря! Келесь, кода кортыть, ловажавтомо – сизема тунъ а соды, мезе мелезэ, сень банговты. Ули текенень валмеревкская: эрванть кургонзо а потомдасак.

Те – келят.

Ёвтнемс, кода ульнесь, тунъ апак сёпо?

Ёвтнеса.

Васняк кодаткак «тапавкст» ютксонок – видьстэ мерезь, вейсэ, ве таркасо удсе-мат-кеверькшнемат – арасельть. Сёпомадо, эсь прянь идемадо мелькак превзэнь эзь сакшно. Паряк, видькстан, зяро иень перть тень эйкак пачкодевлинек... А содан... Мезть а эрсить эря-мосонть... Мон виздинъ теемс эскелькс малавгадоманть, пелинь. Кирдинъ неть мельтнень потсон. Кекшезь кирдинъ. Ёждон Натальнень вестькак эзинъ ледстне, «вечктян» валось кург-стон эзь лисне. Вестькак эзия пала, эзия кутморда.

Аволь весть стардокшныя Наталень кудосо эли кузтемпесэ-пиресэ ськамонзо, Теряй лелявтомо. Аволь чуросто пси читнестэ пельштапо. Ды мезе? Вадря, улиндеряй мелем, путы чай, кофе, аламошка калякатано теде-тонадо ды – вастомазонок! Вана кода ульнесь алкукс.

Истя кемень иеде ламо вечкинъ салава, эсь пачкан, кекшнинъ вечкемам вечкевиксэнъ эйстэ, Натальде.

Лездынъ урныгайсэнь. Лиясо-мейсэ. Чинь-колмонь ютазь совсинъ варштамо, корт-неме Теряй лелянь марто. Кой-зардо кулялопань, телевидениянь материалтнэнь, масторсонок молиция тевтнень кувалма пачколинек мартонзо пси пелькстамос. Мерема, Теряй лелям маштсь марязентень, ловнозентень эли неезентень виде питнень путомо, «сэвтнеме», явномо-путнеме. Маштсь диалогонъ ветямо. Превей атясь, мезть кортамс. Лия марто Пичелесэ а кинь марто ды а мезде кортамс, а кинень пшкадемс. Сон – ськамонзо. Кулозь веле. Каня алкукс велетне весе истят? Мекс истямос пачкодсть? Кие чумось? Кияк арась? Эли аламось-аламось чумотано весе? Улиндеряй весе – те, лисни... кияк. Эрси-арась истя?

Веле, веле...

Сёвонь Микольмезень алкине, олгсо вельтязь кудынест икеле пандочамине. Телень гайги чи. Салазкесэ ды эйгажасо киракстница эйкакштне, кода коткудавт пизэсэст: кузить, ардыть,

чийнить, пижнить... Якшамось а маряви. Чамаст эвтемадонть якстереть, палозь палыть. Зняро, кодамо вий ды кемема икеле чинтень неть а аштиця рунгинетнесэ! Умок те ульнесь. Пек умок. Стувтомс вана эзь стувтово.

Ней Сёвонень юртсо пря невтни, каштансто ваны лиятень лангс покш, кавто сэрксэнь якстере кирьпецень кудо. Сонзэ прок кияк мунизэ-колдовизе:

Ламо-ламо иеть икелензэ пандочаминесь эзь маря, ды уш зярдояк а мари, а цёрынень, а тейернень вейкеяк вайгель, ве телеяк эзь пурнавкшно кирякстнеме эйкакшонь пизэ.

Велень тевтнеде арсезь, совсить удемезэнь ютазь пингень колоньгемень иетнестэ якстерестэ чудия лейтнеде сёрмадовкстнэ. Мезекс, мезень кис, кинень эрявсь ильтямс тоначив Теряй лелянь кондытнэнь? Мезе те макссь? Секень вант, теде ламонь кувалма эрва мейсэ сюпав масторсо эрятано кажосо.

Бути, мельсэнть, колмо-ниле чить кодаяк а пачкодильинь Натальмезнень – кудонь тевть, кодаткак лия тувталт, – эрва юткошкасто валгиль седейзэнь тошначи, теке ёмавтылинь мезеяк пек эрявикс, педсезь эйзэнь ёжо, теке мезе-бути тень а саты, китны мезень-бути кувалма мештесэнь верень пансицясь...

Вастован те аволь сэрэй-келей аванть марто, ды эрямонтъ каргоцьчизэ поты, валдоми, пештяви безарьксэнтъ таркас кеняркссо.

Зяроксть эзинек вастневе Теряй лелянь марто, кулелямонь, Натальнень акемемань валт, видьстэ эли чирьстэ ёвтазь, пельдензэ эзинь марсе. Кемсь, кемсь, монень маряви, нинстэнь педес-пес. Кода илязо аште, ульнинек мартонзо ламонь кувалма паро ялгакс. Зярдояк лангозон эзь пеняця, пеень пачк эзь корта. Чевте вайгелезэ кадовсь тень паро ледстнемакс.

Таго Натальде.

Свал кирдинь мель содамс сондензэ седе ламо ды эрва ёндо. Кие сон, кодат бажамонзо, кодамо вечкевикс, оймень туртов тевезэ – хоббизэ, улить-арасть эрямонь тештензэ, ков сынть тердить? Кодат ютазь кинзэ-янонзо, ков ветить, кодат лия ёнкст корсонзо... Мель явинь, содави, – теевемс седе малавиксэкс.

Карминь содамо: кемгавтово иеть эрясь мирде марто, ульнесь урвакс. Явсь. Мекс? Эзинь кевкстне. Авадря. А кевкстнить. Сонсь валгак эзь ёвта. Чачтась-кастсь тейтерь.

Пинге важдось филармониясо морыцякс, ансамбля марто ардтнизэ масторонтъ трокс-кувалт ды трокс-ушкс. Пачколесь томбалевгак. Пенсияс лисезь, кундась кудонь-кардазонь тевс. Путсь эсензэ велес кудыне ды тундонь лембе читнестэ саезь сёксес эри тесэ, чачома масторсо, ютавты чинзэ пирень ды кудоютконь певтеме мелявкстнэсэ. Тевень ды кудоютконь ваньксчинь вечкиця – тень мон редия сеске. Валонь кирдий. Вановтом вакска эзь ютакшно теяк: эйсэнзэ кирдеви микшнемань-рамсемань, ярмаконь ванстомань-таштамонь ёжо.

Нурькинетэ: берянь, эйстэнзэ шаштовтыця, явиця, кодаткак авитевиця безарькс ёнкст эзинь тешкста.

Теньгак а кекшсак, тедеяк мерема: вечкиця седеесь, те уш эседень, – сокор, ламо мезе а неи, ламо мезенть а редясы, юты вакска. Мон истятнэстэ...

А сонсь Наталь?

Кода вансь монь ёндо эрва мелензэ топавтоманть лангс, кодат ёжот ченгсть-палсть потсонзо? Эли кодаткак арасельть? Каня эзь чарькоде, мезень кувалма, мекс, теке уре, топавтынть эрва, лиясто стяконь, кольнема ёнов молиця энялдоманзо?

Арсян, чарькодсь, ансяк тевтне-усксематне сайнесть верькс. Лездынть аволь ансяк урныгайсэнь! Васолдо неявиця ожо тюрс сайдингсэ вельтязь кудонь чапось, вакссонзо латалксось, пирекенкшкетне, пирявкстнэ – сынть «сювордазь» монь кедьсэ. Соват баняс – мазычиденть аймельгадат! Аволь баня – таташке. Тень теия, чарькодеви, ярмакто. Теия мелень путозь. Теяк, важдовельгак сиведезь ломань, саевель кавксть, паряк, колмоксть седе ламо. Кода илязо уле, чипайкс вандолдыця те кудынесь кадовсь весемеде астувтовикс ледстнемакс Наталь марто ояк-счиденек, сеть, ней уш умонь, иетнеде.

Мезде илязо тошка седеесь, бажинь топавтомс энялдоманзо, лездынь. Кирьвалесть-эзть вечкемань икстерькат Наталень мештесэ? Кодат ёжот яксесть эйсэнзэ? А содан. Истят кортамот ютксонок арасельть. Палсь седельмась, велявтьс куловкс... Мезе ульнесь – ульнесь.

«Коське», ламо иень романом прядовсь апак учо.

Весть Наталь тердимим Валдайвелень найманов. Эрявсь, улема. Мезеньгак рамамо, паряк, миеме. Бути эряви ды бути шкат ули, мекс ломанентень вадря а теемс? Сынек шкастонзо. Чипаесь эзь кенерекшне кирвазтеме каштомонзо. Пси эзь маряво. Тень лангс апак вано, ломантне кашкасть, теке коткудавт, вешнесть кинень мезе эряви ды седе уцяз. Эрьва ёндо пирязь келей-кувака таркась увнось вайгельтнеде, урныгайтнень урномадост, тандавтниця вешксемадост.

Аравтыя урныгаем совамо тарканть малас, панжия удалце кенкшенть ды одс озынь тарказон ветямкаенть экшс. Наталь саизе кавто ёндо ды кандызе васня лапужа, аволь домка ящикенть, кандынзе вейсэнъ кувака стувор пес, мельганзо – омбоценть. Эйстэст эрязкалезь таргсинзе кстыйде пешксе литрань покшолмасо пластикень ведрынетнень. Аравтнинзе седе мазыйстэ ды неявикусстэ. Стясь стуворонть экшс ды ушодсь, тей-тов ваннозь, рамицянь учо. Прясонзо кувака нерь ашо кепкине, лангсонзо ламо зепе-зепине марто ашназа тус панар. Кирьгазонзо понгавтозь кескавне – те сонзэ «кассазо».

Урныгаем пания лия таркас, аламнеде веёнов. Пельспанжадо кенкшканть шкань-шкань варштнян микшнициянт ёнов – «чиить-арась» тевензэ? Меремс, ламо рамицянзо, а мерят. Ялатеке аламонь-аламонь, ванан, кирдевицят, кевкстницият-ванныцят икелензэ пурнавкшныть. Седе ламо, кода эрьва косо, эрьва кода кизэкс оршнезь аваломанть. Наталь тевень содазь, ливчаниясто кайсесь кстыйтнень ведрынетнестэ рамсициятненень полиэтиленень кескавнес, ловсь, сайнесь ярмакт. Ве таркасо, лисни, тевезэ эзь нерьге.

Шкась мольсь.

Ванан, Наталень каршо стясь бурина, палманень сэрсьэ аволь од-сыре цёраломань. Раужо сакалонзо нурыкинестэ наразь. Тусто-раужо, теке кренчень сёлмот, черензэ нолдазь лавтовонзо ланга. Марявсь тень, чикуншкань эрициятнень эйстэ. Чамакиськезэ тюзала, сельмензэ-сельмечирькензэ раужот, судозо будолма марто. «Тостонь, тостонь, неяви...» – прынь мельс.

Кемевсь тень, те рамицясь колмошка ведрынеть «амольди» апак кавтолдо. Тень таркас – кувака, монень эзь маряво мезде, налкставиця, сельместэ сельмес ванозь кортамо. Кортасть, кортасть, цёрась апак учо юрк ютась стуворонть пева Наталь ёнов, стясь ваксонзонзо ды вить кедензэ, теке мезеяк араськак, теке ваксонзонзо низэ, каизе Наталень лавтовонзо лангс, норвиксэль паламонзо. Наталь, цельнезь-пейдезь, керш кедьсэнзэ виень путозь тостядизе сакалов альгачонтъ. Вырк потась визькстэментъ эйстэ. Стувтызе, мереват, микшнемань тевензэяк.

Те идем сценазь сыржавтынзе тортан. Кирвазинь прякасосто пильгесурс. Неезесь тень ульнесь гай маней чистэ пурьгинень зэртекс. Кода кирдевьс прям – чиёмс кутморициятнес ды кирьгадо чочамс, кадык мондень сэррей, чикуншка ёнксонъ раужо черень кандтниянтъ, – превс а саеви. Паряк, лияккак теемаль: нолдамаль моторонть ды ношкстамаль кудов. Истяк эзинь тее. Кадовинь.

Найманось прядовсь. Носкозь-чатымонезь, Наталь пурнынзе микшнемань кедьёнксонзо вейс ды кандынзе «Ниванть» ваксс. Сонсь панжизе удалце кенкшенть, путынзе урныгаентъ потс чаво ведрынетнеде-мезде пешксе ящиктнень.

Мон чувтомозь, «кельтеме» аштинь озадо ветямкаенть экшсэ, ванынь икелень вальмаванть, неемс мезеяк эзинь нее. Лездемодо эзинь арсеяк. Вал эзинь правто. Аноколинь сезевемс апародонтъ. Сорнынъ. Эзь кирдеве, потсон гувнось акемемань, кулелямонь тол.

Кальцьк, мария, мерсь кенкшкесь. Озась Наталь. Виень путозь пекстызе мельганзо кенкшкентъ. Нолдыя, мотордозевсь моторось, ды састыне сыржавтыя урныгаентъ икелев, Пичелев келей кинть ёнов.

– Тон, ванан, анокат мадемс, – эзинь кирдеве, лиссь кургстом, – эрвань алов. Ёвтынъ валтнэнь вайгелень апак кепеде, явнэнь-явнэнь. Сезия пилес эциця ды кутькиця чатьмонеманть ансяк кенеринек лисеме Валдайвелестэ.

– Нейке лоткавтык! Нейке! – соракадсь, кедьсэнзэ, теке карводо, ахолязь, пиже-ожо вайгельсэ серьгедсь кабинасонть вакссон аштицясь. – Лоткавтык, нейке лоткавтык, лисян!

Мон чатьмонинь. Ёвтазь валдон шожда тень эзь карма. Эзизь оймавто верем пижнемат-неяк. Сынст кунсолосо «лишмем» эзь арсеяк. Кургонь пекстазь пачкодинек Пичелес, пачтия Наталень кшнинь пирекенкшест икелев. Лоткавтыя «Нивам», панжия удалце кенкшенть, капшазь таргсинь ящикензэ-мезензэ, пекстыя кенкшенть, озынь ды велявтынъ ажиян кудов. А монь, а Наталень кургсто эзь пра валгак.

Мезе сестэ, кизэнь се маней валскестэнтъ, лисекшнесь наймансо микшнемстэ, чумоль-аволь Наталь, кадовсь асодамокс, ваясь шкань чопода потмакстомо отьмас. Паряк, а истя теекшнинь? Кода, алкуксккак, а покордавомс тензэ валтнэде, конатнень ёвтакшнынъ сестэ ды конат эзь стувтово течис? А кода сестэ улемаль эстенъ?

Истя прыдовсть ламо иень перть вастневеманок, оякчисэ ды аволь кеняркстомо эрямонк. Кадовсть эйстэст, кадовсть видькстамовтомо вечкемадон валдо, ёжонь витиця ледстнемат. Паряк, те ульнесь ванькс-маней, прок од шкань, вечкема? Монь ды ...сонзэ? Эли те ульнесь седейшкавань оякчи? Содык варчик...

Чуман? Кевкстнян ней эсь прям цянавокс ливтница иетнень ютазь. Кочксян прысон кеняркссо эрязь иетнень ды янксян, мекс истя шождасто, мик псистэ, кемзисемге иесэ цёрынекс нолдакшнынъ кулелямонь ёжон... Мекс сестэ эзь кирдевкшне ведьмень?.. Эряволь тень седе превейкс улемс... Эряволь, эряволь... Удалце превсэ минь вейкенъ пес превейтяно.

Те ней, ламо иень ютазь, васолдо, ён, паро кортамс, превть максомс, астака улемс откерекс. Сестэ... Ломанень оймесъ, яла кортыть, – чопода. Сонзэ панжомга, седе домкасто содамга, вейсэ эрязь, ютама ламо келей-кувака кить, конатне ламонь таркава почодозь поркснезь суликасо.

Омбоце ава марто эрян. Курок топодить кемзисемге иеть, кода Груня марто вейсэ нергтяна. Ды мезе? Грунянь корозо таркань-таркань каднови чопода векс. Истямокс уш, мерама, сась Ломанесь Мода планетанть лангс.

Абунгалемс а мезть: Модамасторось, Менельёнктнэ ды весемесь, мезестэ сынъ аштить, эрить-кирдевить авейкетъксчинь коентъ лувсо. Эрьвась – сонсь. Модась, Ковось, пиземень байгинесь, молекулась, атомось... Лия истямо, сонзэ кондымо, – вешнек эрямопинге – а муят. Видестэ вейке ине поэтэсь мерсь: эрьва калмонь марнэнтъ ало калмазь Чипелькс.(косо-бути те мелесь ёвтазь, икеле)

Черькаень Наталь кадовсь паро, чинек-венек тевсэ лакиця ломанекс, ялгакс. Кодамо сон обуцянь, коронь коряс, потмоёндо, кемень иень перть эзь панжово. Тень туртов эрявьс ютамс кувака, чувнозь-лазнозь, таркань-таркань поркснезь суликасо почодозь ки. Ды аволь вейке-омбоце вайгельпе. Эрявьс эрямс вейсэ, ве кудосо. Ды аволь ие-омбоце. Неия, наймансо тонол раужо пря цёранть марто эльнемадонзо башка, ансяк паро ёндо.

## Кевень седей

### Кода тетя пшкалить?

Кизэнь маней аволь пси чи. Аловелесэ ютавтово эрзянь кезэрень Озномань покш кой-кирда. Сакшность эйзэнзэ эрва ёндо ламодояк ламо ломанть, морыцянь курот, киштсть-морасть аволь ансяк тестэнь, лия ёнкстнестэ сыцяткак. Ульнесть зяряя омбомасторстояк. Истят Эрзянь Инешкипазонть Озномат-покшчить ютавтневить вельть чуросто.

Прок кодаткак раужо, тандавтниця пельтькак зяряя пингеть а кирдевить эрзятнень вельксэ. Моротне-киштемагне, налксематне, эрвела ёжотне жойнесть-шалность чадыведекс келей луганть келес. Певтеме мизолкст, пеедькшнемат, кенярксто цитниця сельмть...

«Мекс ломантне куш аламнеде васов а ваньцят, сокоронь кондыт? Мекс неить ансяк сень, мезесь судост ало? Мекс марить ансяк сень, мезе мерить верде? Мекс эрить ансяк течинь чисэ?» – чарасть-велясть ды эзь паневе, прок кирмалавт педясть, Ёгань Тимань Теряень превсэ арсематне, зярс эскелясь тарканть, косо учось бусост.

Покш чинть прыдовомга цёрась сырғась кудов. Пазикесь, конас кузь-совась, – пешксе. Ютась удалов. Муевсь, теке сонзэ учось, чаво таркине. Варштась тей-тов, озась. Эйстэнзэ вить ёно аштесь, вал эзь правто, келей чама, валдо черь-чама цёра, керш ёно – ава. Сэрьс, озадояк чарькодевсь, Теряйде аволь сэрей. Нурькалгавтозь тусто черензэ судрязь човоньс, сьулмазь парсеень лентынесэ. Тей-тов юхайть пулынекс. Теряй эськанзо тешкстызе: «Аволь цивтор журналтнестэ, ялатеке ваксканзо лангозонзо сельмень апак кая а ютат...».

Зярс-бути ардсть чатьмонезь. Кунсолость икеле таркатнесэ озадо аштиця аватнень лужаня кувака морост ды седямонь таркас моторонть урноманзо. «Теяк, – сась мельс Теряй, – мезть, мезде кармат кортамо асодавикс марто? Келентькак онкстызь кирдемс кавто часонь перть, кудов пачкодемазонок, а ён». Илязо каназкадо...

Васенцекс кшувавтызе лепштиця каштмолеманть, эскельдясь троксканзо, макссь вайгель, Ёгань цёраст – Теряй.

– Кодамо, тонь койсэ, морокуро морась весемеде парсте? – велявтызе шержей кавшаня черь прынзо аванть ёнов ды салонсонть морыця вайгельтнень пачк серьгедезь серьгедь чатьмониця, икелев ваньця шабранстэнь; керш лавтово тень пингстэ, маризе, токавсь аванть вить лавтовс.

– Кодамояк, – ёртозь ёртынзе валтнэнь, велявтызе прынзо, варштась кевкстниця цёранть сельмс асодавикс авась ды апак кавтолдо, мештензэ икеле кедьсэнзэ ахолязь, ёвтызе эсь мелензэ. Кортамсто човине турванзо ютксо кувтолк-кувтолк кивчаесть вейкеть ашо, теке арт-озь, пееензэ.

«Вый, кодамо мазый! Косто Инешкипазось кандызе тей истямонть? Сэнь сельмть, аволь кувака, эль редявикс будолминев судо, пееень ванстыця турват... Истямо чуросто-чуросто понгони сельметь икелев...» – токавсь, сась мельс цёрась.

– Те кода истя? Истя, мон меревлинь, а эрси, – берянесь вадравтомо а эряви. Те – пингде-пингень кой. Сон киненьгак а полавтови. Кияк ды морась ветень питне, – вить кедьсэнзэ Теряй юхадсь икельганзо сравтневикс коштканть, псистэ варштась сельмезэнзэ, эзь пра вемельс сеедьстэ кортыцянтэ марто. Гайгиця вайгельсэнзэ марявсь кеме кор, нардевчи.

– Истя вана, моравиця морось ютавтово седеень пачк, тосто лисезэ, сестэ сон чачи морокс, сестэ карми гайгеме ды ёвтнеме кодамояк ёжодо. Истяко... – авась пря эзь максо, мелензэ верьга вайгельть ёвтамсто сеедьстэ ахолясь кедьсэнзэ, мерть, потевтеме (теньгак редизе Теряй) мештензэ икеле, неявсь: обуцязо – тол.

– Паряк, истяк. Мон неть тевтнеде васолан, маряви, видеть валот, – сэтьме вайгельсэ, апак тално ёвтызе тень лангс вановтонзо Теряй; аламнеде сюконязь аштезь, видементизе рунгонзо, варштась превень максыцянть лангс, козкстась ды поладызе: – Кортнетяно, а кинень кода мерить – кашт. Мон – Теряй, Ёгань Теряй.

– Вельть уш леметь кодамо-бути чуросто вастневиця. Теряй... Васенцеде марян. Косто истямонть муик? – кевкстнициясь, прясонзо тей-тов чиремтнезь, эсь лемензэ ёвтамонь таркас кармась пеедькшнезь кевкстнеме-исковамо валонть юрдонзо. Кедензэ лангсек-лангсек путозь кирдсь элесэнзэ.

– Мекс ачарькодевикс? Эрзянь тюштянь пингень лем. Паряк, «терявтомс» валстонть. Монь койсэ, сядоксть мазый эрва кодат Альбертнеде, – кармась ловомо керш кедень сурсо Теряй, – Эдуардтнеде, Христофортнеде, Евлампийтнеде ды лиятнеде. Эзить марсе советтнэнь шкатнестэ пек содавикс «народной» академиктень Мальцев Терентийде? Арась? Содавиксэль ломанесь, пек содавиксэль... А кода тонеть пшкалить? Ёвтасак-арась?

– Мон – Черькаень Наташа, седе ламот – васняк, велесэ – мерить тень Наталь. Морыщян. Важдян тескень филармониясо, – икелев, ветичянть ёнов ванозь, гайги вайгельсэ ёвтызе аволь ансяк лемензэ, важдема тарканзояк.

Авась чатьмонезевсь, лепштинзе турванзо, теке учось, мезе вадря-паро мари шабранзо пельде. Седе ёнсто путызе кумажанзо лангс раужо цивтёркай юдминензэ. Вить кедьсэнзэ витизе ашо, пизёлонь якстере цюцькасо «пупсезь» панаронть сивензэ, нолдызе керш кедензэ ды путызе юдминенть лангс. Вить кедьсэнзэ кирдсь, илязо томбаво-эшкeve, икелензэ кшнинь недьсэнтъ.

– Тетят эли ават казизе тетъ те мазый, зэмень кирдий лементъ? Эрзянь кельс ютавови – «парочи», марсить? – пеедькшнезь, паро ёжосо шнызе Наталень лемензэ Теряй, саизе вить кедензэ икелензэ озамкаень кундамостонтъ ды нолдызе, кода Наталь, элезэнзэ, велявтызе прянзо аванть ёнов ды яволятсь тензэ: – мон тетъ карман мереме Натуш, эрзяк, кода пшкалестъ покштянь покштянок. Каршо молема а кармат?

– Арась, – мельспародонтъ цивторк мерсть пеедэнзэ, пейдезевсь авась, – гайги? Алкук мазыйстэ? Зярдояк эзинь арсе. Тетям мерекшнесь аванень путомс те лементъ войнав туемстэнзэ, авам – каршоль. Сон путыксэль Маруся. Изнясь тетям. Превеель... – Апак учо нусманя сувось нардызе чамастонзо эрвела ёжонь тешкскентъ.

– Тетят... кирдевсь мельсэть? – нурькине чатьмонемадо мейле варштась салавине, кевкстизе Теряй прянзо нолдазь аштиця Натушонь. Косто-бути васолдо апак учо сась тензэ мель ёвтамс аванть мезеяк вечкевикс, чевте, лембине, седейс педиця.

– Арась. Ковонь югазь чачомадон мейле – авам тень зярыяксть ёвтинизе – сонзэ саизь немецтнень каршо «за Родину, за Сталина» тюрьеме. Мекев уш эзь велявто. Касынь тетявтомом. Секкак превзэнь мезеяк, кодамояк ледстнема эзь кадово, – прядынзе валонзо цёранть килангонь ялгазо ды, сельмень апак кончтне зярс-бути буссонть икеле озадозетнень лангс ванозь, стакасто лектясь.

Нетъ валтнэнь марязь, ледсть Теряень мельс ледстнематне эсь тетянзо марто явовомань чокшнесь. Ледсь мелезэнзэ мизолксозо, вайгелезэ, якшамо кудованть, мекев-васов яказь, мелявкссто пешксе сельмензэ. Тердекшнлизь Сура чирестэ, косо чувовсь-путовсь немецтнень каршо туремань бусь. Удось, а валскестэнтъ саизь тов, косто уш эзь велявто. Ульнестъ ацамковонь пейсэст чикордыця якшамот. Кода эзь врадо, менсть сеть якшамотнеде ды вачо иетнеде, превс а саеви Теряйнень течис.

– Тон авать – ськамот? Вейкине эйкакшат? – кивчк кепедевсть сельмечирькензэ, кевкстизе Теряй, мекс-бути стакасто лектясь ды чиремтизе прянзо керш ёнов, седе парсте марявост Наталень валонзо.

– Тон мезть... Каня а содат, аванок шкасто вейке эйкакшто кортамот, мерть, эзь марсеве. Те ней... Мон колмо лелядо мейле нилецян. Чачинь кемнилее иень югазь веженсь лелянь чачо-

мадо мейле. Истя уш лиссь авань... Кемнилее иеть касынь вейкешкакс. Кодамо тонь чачома пизэть? Ламольть эйсэнзэ левскетнеде? Ламот ванстовсть? – паморькске кашт, ды пшкадсь Натуш, валтнэнь лодорсо певвердезь. Истямокс, капшазь, марявсь Теряйнень Натушонь кортавксозо.

– Монь... Мезе монь... Ветенек авань ульнинек: колмо тейтерть ды кавто цёрат. Ветенек войнадо икелень видеветь. Вете... Аволь кода ней – вейкеськак а муеви! Мусызь, таго кажо – ламонень удем мартокс, ломанекс а кепедеви, – Теряй козкстась, таргась понксонь вить зепстэнзэ пачине, нардтнинзе турванзо, ливезденть – конянзо, нерыгстызе пачиненть, састо нолдызе вить кедензэ, тарказонзо.

Бусось кисэнтъ та-кодамо авейкетъчидентъ аламнеде нулк-чирть тейсь, ды Наталень вить пилензэ вельксэ черень кавшаня пакшкесь токась Теряень чамабокас. Пачканзо цёранть ютась чевте лембине налнэ. Истя сон вечкесь! Аноколь энялдозь серыгедемс ветицянтень: варчик, ялгай, чиремтик бусот омбонькирда!

– Вай! – лиссь Наталь-Натушонь кургсто тандадомантень, ды кавто кедьсэ автордась икелензэ кшнинь недентень. Кишк шка – оймась, кортазевсь допрок лиядо: – Тонь, содави, чинек-венек музгордиця ни, эйкакшт... – валонзо ёвтынзе апак эрязкале, явноть. Мезде-бути арсезевсь. Конинзе сельинзэ.» Сыргозсь», чиремтизе прянзо ды варштась, учозь, вакссонзо аштицянтъ чамас. Лыказевсь, полавтынзе пильгень тарканзо.

– Неят, тень аволь колоньгемень, аволь ниленьгеменьгак, секскак... – пейдезь ды теке прянь шназь ушодсь Теряй. Вановтозо эртевь аванть цивтёрдыця вановтс, – секскак, кода монень маряви кевкстнемс а мезть. Истя, монь ялгинем?

– Нолдык чумом, невак кевкстема, пиций... Эрят-арась тон нить марто? – видьстэ, аволь пулонь кайсезь, кевкстизе авась Теряень. Мерсь ды сускизе, алце турванзо. Варштась бусонь вальмаванть ваксканок уиця пижестэ оршазь чувтотнень-куракштнэнь лангс. «Каня истя, визьксэнь апак сода, пшкалить? Кодаяк седе стамбарнэ эряволь, мон теке узерекопорьсэ...» – янксезевсь эсь пачканзо Натуш. Янксек-иля, валось аволь нармунь.

– Мезекс те теть? Ну, эрян... Мейле мезе? – ливчанысто келемтинзе панжадо коморо кедензэ мештензэ икеле, вейкенъсэнтъ кундась икелензэ кундамонтень, омбоцентъ путызе кумажанзо лангс. Эзь тые Теряень мельс. Мик кодамо-бути навола ёжо пачканзо ютась истя набойстэ, апак визде ёвтазь кевкстемадонтъ.

– Истяк, – лия мезеяк эзь муе ёвтамс Натуш, тень мерезь, одс велявтсь вальманть ёнов ды одс педявтызе вановтонзо тона ёнга сиземань апак сода удалов кадовиця кизэнь пейзажтнес.

Ваны, а сельмензэ икеле аволь сравтневезь паксят, аволь чувтонь пиже лехат, а алкине кузтемпень чалгавкс лангсо озадо аштиця лунь ашо пря сыре авазо. Учи, чить лови, зярдю пачкоди, кецневтьсы тейтерезэ, марясы вайгелензэ. Лангсонзо раужо паля, кедьсэнзэ мандыне. Икелензэ лугинентъ лангсо улы, венстинзе псидентъ пильгензэ, Ашкай пининезэ...

Кортамотне кавтотнень ютксо зярс-бути эртевьстэ пирявксос.

– Таргицят? Косто-бути махрань чине маряви, – сыргозсь, сорнозевсь прок тандавтниця ондо, лутызе вановтонзо розень-товсюронь зярс пижела тюс паксятнестэ ды варштась, ютавтызе вановтонзо икеле аштиця ломантнень пелев, – те кинь истя набойчизэ сатотсь?

– Арась, а содаса, мезе те истямось. Чинесь..., монгак мария, качады, маряви, салонсонть икеле таркатнесэ ардыцянтнень ёндо, – никстась весть-кавксть ды тертязь вайгельсэ, мельдевалдо, валтнэнь таргсезь мерсь Натушнень Теряй. Сонсь вановтсонзо яла вешнесь чумонь теицянтъ. Кадызе тень. Чатьмонезевсь. Конинзе сельмензэ.

«Мезде карми сы кевкстемазо? – арсезевсь Теряй. – Вейкенъ пес тензэ содамо. Секень вант, копорян-арась, кевкстьсамам».

Истя лисськак.

– Кода тон, Теряй, ванат симнеманть лангс? – каятотсь, теке цяпадизь пилеюрга, ды теке те кевкстеманть Теряй сельмень конязь учось иень перть.

– Мезде? – панжинзе сельмензэ, пейдезевсь, Теряй, полавтовсь сонзэ кайксэзэ, згилязь кевкстизе эрва мезде содамо бажицанть. – Лисьмаведте, чайде, кофеде, пепси-коладо?.. Эли конадояк пальцятнестэ?

– Теке а содат... Ченькстэ, содазь, моли кортамось, – музгордезь мерсь ды нолдызе вановтонзо алов Натуш, а стакаль чарькодемс – од содавиксэзэ пеедькшни лангсонзо. Зярыя шкань перть, теке аламнеде покордавсь, Натуш вадяшась истякояк валаня, кумажанзо лангсо кирдевикс раужо цивтёрдыця юдманзо. Окойники юдманть ёзыця кедезэ оймась.

– Кода меремс, – стамбаро, валтнэнь явноть, ней апак пеедькшне мерсь Теряй, сонсь вансь, мезе-бути редясь, икелев, – савкшны кой-зярдо кепсемс цярканть. Эрямонок ней истямо – куш эрва чистэ кепедть. Вастомат-вастовомат, ильтямот, покш чить, чачома чить, фести-вальть, олимпиадат, чемпионатт, чачомат-калмамот... Мезеяк а мерят: сюпавсто-эрвеласто эрятано! Секень вант, копордамонь певтеме тувталтнэ усksamизь рудаздо пешксе латкос. Эли уш ускимизь? Икеле симсть чоподачиденть, ней – валдодонть, вельть уш ламо содыть, эрвань диплом. Содык варчик ломаненть! Вана истямо монь «теориям» симнемадонть.

Натуш кунсолось прянь нолдазь ды ве таркас ванозь.

– Истя, истя... Видестэ, Теряй, кортат... Теня, телефононь номерэть а ёвтасак? – эряза-сто кепедизе прянзо ды апак учо ингельёнт велявтызе кортамонть авась; ёвтынзе валонзо ды чатьмонеzewсь, каршо валонь учозь, варштась вальмава ушов.

– Мезекс? – кувтолк варштась Теряй аванть лангс ды валонть лангс лепштызь, мик кежт-неде вайгелень кепедезь, кевкстизе ушов ваньцянт. Сон талай чарькодизе, кона ёнов чиремти ваксонзо ардыця «пулынень» азоровась.

– Истяк, – велявтызе прянзо Теряй ёнов, варсодизе валонть ды пейдезевсь Натуш цельця тейтерекс.

– Сёрмадомка муят? – прок мельде-валдо, пельвайгельсэ пшкадсь цёрась аванть, кува-касто таргизе оймензэ.

– Муян... – валонть нилезь, эрязкалезь саизе кумажанзо лангсто юдминензэ, панжизе, сокарясь-тейсь ды таргась мезе эрвань – сёрмадома кедьёнкске ды коморс кельгиця блокнотке.

Теряй чарькодевиксстэ, эрва цифранть явозь, ёвтызе номерэнзэ ды теке басом ледстизе:

– Сестэ эно тешкстык эсь номерэтькак, – кармавтозь, Натушонь чамас ванозь, мерсь Теряй, сонсь а соды мекс, вельть марямга.

– Мезекс? – ней Наталь налкsezь кончтась ды пейдезь максызе теке кевкстеманть. Сонсь цирь сезь блокноткестэнзэ лопине, тешкстызе эсь номерэнзэ ды венстизе Теряйнень. Нерьг-стызе блокноткенть тарказонзо, пекстызе – цянк мерсь – юдминензэ, конань путызе седе ёнсто элезэнзэ. Керш кедьсэнзэ кундась икелензэ недентень.

– А содан... Паряк, маштови мезекскак, вастовтано – кунсолоса морамот аволь сцена лангсто, седе маласто, – Теряй мизолдозь саизе венстезь конёвпанксенть ды путызе панарзе-пинезэнзэ. Превсэнзаяк арасель: зярдояк карми мезекскак маштовомо. Юты шка ды ёмавтсы.

Теевсь кавто ёндонь чатьмонема. Чамдовсь, маряви, гулькакс гулдордыцятнень куля-монь, содавиксэкс теевемань паргост. Оймасть, сизезь, бешом, икеле эземтнесэ морыцят-неяк. Энгамсть вайгелест. Теде седеяк виевстэ поладызь велувонь кувака морост бусонь кап-шиця-капшавтыця чарытне ды чаравтыцяст. Тандавтниця-калдордыця моросост марявь мезе-бути лангс пеняцямо ды теке марто та-кинсь сялдома.

Шкась мольсь. Мезе сиземась – сон а соды. Мелезаяк арась содамс.

Кортамотне кортавь, моротне моравсть. Веенстнэ, сизезь, чатьмонсть, лиятне нувсезь, неявсть удышяткак. Курок бусось пачкодсь ошонь автовокзалонть икелев. Эрвань бажась седе курокке лисемс. Меельцекс кадызь бусонь стака коштонть Ёгань Теряй ды Черькаень Наталья.

«Черькаень, – сась, сонськак а соды косто, Теряень пряс мелесь бустонть лисемстэ. – Натушонь нурькине, чевтинестэ-куроксто ёвтавиця лемезэ, кода ютавтови эрзякс, содаса а вана кудолемест... Лисни, буесэст кие-бути ульнесь черькиця, озадо а аштиця, лыкиця. Ютась шка,

ламо иеть, паряк, аволь ве пингеяк, ды те валось теевсь кудолемекс. Истя-аволь – содык снар-тык!»

– Ну, мезе, тейтерь, чива-кудова? – паро кайкссэ, нардев гайги вайгельсэ путсь Теряй пе вейсэнъ ардомантень. Сонсь оржа вановтсо кивчк варштась аванть чамас, сельмс, кирдевсь вановтонзо теке тейтерень рунгонзо лангсо. «А сон алкуксккак аламнеде мондень алкине», – меельцекс тешкстызе эськанзо Теряй.

– Мон а содан, паряк, кодаяк вастовтано, паряк, арась, а вана те вейсэнъ ардомась, седеяк – «калярдомась», кадовить паро, астувтовикс ледстнемакс, – ёвтызе мелензэ Натуш. Максые, мизолдозь, лепштыамс кедькоморонзо, кивчк варштась Теряень сельмс ды текекс явовстыкак. Эрьвась тусь эсензэ киява эстензэ.

## Кеминь, учить эйсэнь маней зорят...

Ютасть малав кавто иеть. Ёгань Теряень эрямозо велень советсэ кемекстазь нинзэ марто мольсь, кода кортыть, чикор-лакор. Чи юты – сёвнома, омбоце сы – теке, пси тол ацирьгалемат, стьяконь кис инзамот, седеень раздий аксунгалемат... Те а истя, беряньстэ, тона... А тезэнь озыть, а тона ёнов варштыть... Савкшнось натой лиснемс вензэ лангс удомо шабратненень, невак та-ков. Весть таргонь перть удсесь ялганзо кедьсэ.

Истямо «уцяскадо» пешксе кудосо ютавтсь пингензэ Теряй ие, омбоце, колмоце... Эзь сода цёрась, мезе теемс, кода улемс, кода кацтамс, кардамс ордакш нинзэ ордакшкалемадонзо. Мель путсь совавтомс кудозост валдо, сэтъмечи, вейкенъ-вейкенъ чарькодема. Тень таркас...

Кирдевсть превсэнзэ мельть эйтэнзэ допрок туемадоаяк, вешнесь газетава-кува адрест, кие нолды эрямо. Мукшнось, Ансяк кинь мельс туи кодамоаяк чеерьваря колмо нупалень квартирань таркас? Истят мельтькак содавтнизь: кие тетъ карми лия таркасо пидеме-панеме, мельгат лопавтнеме-муськеме? Муемс истямо пизэ...

Эзь лезда оякчисэ, апак сёвно эрямонтень, седеяк меельце шкасто, нинзэ эрьва палманентень кулелямозояк. Кинень, кодамо аванень ансяк эзь «педявтне»! Вансь, прок пшти сельме мучказ, эрьва эскельксэнзэ мельга, ков мирдезэ, Теряй, мельганзо сон, низэ; ваннось, «никсесь», пельсь, ванстсь, илязо сьулмаво полазо лия ава марто.

Зыян кандсь теяк: сон эзизе сода мирдензэ келенть, кортась рузкс. Те эзь вечкеве Теряй-нень, меельце иетнестэ свал кирдевсь эйсэнзэ те ёжось авалгстовикс кевпоколекс. Седеяк, зярдонензэ савкшнось вейс пурнавозь зярыя эрзя ютксо кортамс рузкс.

«Те кодамо эрямо?..» – ризнэзь арсиль, онкстниль эсь пачканзо, зярдонензэ сувокс валгониль икелензэ кудонь эрямозо, зярдонензэ ёмилъ эрямонтъ зэмезэ, зярдонензэ цяксадыль ды анок эрсиль явовомс эрямонтъ марто.

«Мекс, алкуксккак, а кадомс седеень раздиця, тоначив паниця кежпаргонть? Эйкакштне покшт. Эрьвань эсензэ кизэ. Весеметь, мейсэ сюпаван – содамочисэ, тевсэ, седеймарямосо, – максыя тенст, ней мон сыненст истя, кода икеле, а эряван, куш варчния тетявтомом эрямонтъ танстензэ касмодо верьга – аволь медь. Мезе эно кирди? Эрямо тарка? Аваломань? Тергень таркас олячи? Маряви, теяк, тонааяк. А ойментень эряви, оймесъ веши сэтъме, валдо эрямо. Эно мезень кис сынъ моданть лангс?»

Истят арсематнеде, конатне эзизь стувтне цёранть, ледсь та-кода мелезнэ Эрзянь кезэ-рень пингень Покшчистэ вейсэнъ ардомась, авась, конань марто кортнекшнестъ кувака кинть перть ды конань телефонозо, ледстизе, ванстовсь, секень вант, эрямо таркань книгинесэнзэ.

Учизе, зярдонензэ кудось чаволь, книгинензэ марто ютась телефононь стуворнэнтъ ваксс, кепедизе почконтъ ды талнозь, пельсь, кияк илязо сова, илизь стардо, кочкизе эрявикс номерэнтъ.

– Шумбрачи, Натуш! – тошказь-сорнозь пувсесь валонзо вить пилезэнзэ лепштызь почконтень Теряй.

– Мон, мон. Те кие? – каятотсь аламось аштезь, почкосонть кашторксонь пачк, содавикс човине, гайгиця вайгелесь; марявсь истя, мерят ломанесь кортась шабра кудосто.

– Те мон, Теряй, эли стув... стувтымик? – омбоцеде седе марямга, талиномадонть кокныця вайгельсэ ёвтынзе цёрась валонзо ды нардевтэ, седе марявозо, лепштизе пилезэнзэ почконть.

– Кодамо Теряй? Те кто... косто? Кто истямось? – эль кирдевсь пильге лангсо, колызь цёранть ёжонзо неть кевкстематне ды юткост «кто» – сь.

– Ды мон, мон... Вейсэ ардокшынек Аловелестэ... Эль стувтык Озномань покшчинть? Кавто иеть ютасть. Ледсь мелезэть? – якстере тус телефон марто стуворонть икеле аштезь, сорнозь, верьга вайгельть ледстнесь Ёгань Теряй уськенть тона песэ кунсолыцянтень умонь шкань вейсэнэ ардомадост.

– А-а-а... Оно ки-и... Ледсь, Теряй, ледсь! Беряньстэ марявить, валтнэ сезневсть! Кодамо паро куля ёвтавить? – цёковокс, марявсь, цёкордсь авась эрямо эли, паряк, важдема таркасонзо. Теряй вить пилезэнзэ кунсолось почкосонть кашторксонь пачк марявиця вайгеленть, кершсэнть – ва кияк илязо сова. – Мезе меревлитель, Теряй?

– Истяк, мезеяк арась, понгсь сельмень икелев телефонот ды прынь мельс гайневтемс, арсемс шумбрачи. Те каня аволь паро куля? Эзитель стувто Покш-чистэ тыц пешксе буссо вейсэнэ кортнеманок? – Теряй ёвтась ниле-вете валт эседензэ, мерсь «вастомазонк» ды путызе тарказонзо кедьёнксенть.

Цёранть кедензэ сорность. Чамаумарензэ палозь палсть. Теке сядиксстэнзэ нолдась стакадояк стака канст. Кувакасто лектясь ды озась стувор эхшс, кундась конёвонь сезезь тевезэнзэ.

Теряй ды Натуш ютксо вастовоматне, таго телефононь пачка, поладовсть. Мольсть салава нурькине кортамосо зяряя ковонь перть. Шкань ютазь вастневсть сельмеде-сельмес. Малавгавтынзе, седе виде карми меремс – вейсэндизе Теряень ды Наталень... Теряень коень-закононь низэ.

Тевесь ульнесь истя.

Весть ниле-вете ломанень промксесэ, косо кортамось мольсь эрзянь келенть ёжодонзо, кулялопань нолдамодо ды конань ветясь Теряйде комсешка иеде од ава, квартиранть азорозо, апак учо келес панжовсь кудокенкшесь ды даволкс совась кежтнеде лакиця-пургсиця Теряень низэ. Сон весень пингстэ карциганокс каявсь мирдензэ лангс, аноколь сонзэ сезнемс. Каявиксель промксонь ветиянтень лангс, кинень кулелясь мирдензэ. Эзизь нолда, кирдизь цёратне, мель путсть оймавтомс аванть, совавтомс превс, кардыксэлизь. Мезеяк эзь лезда.

Берянель, визькс ульнесь те идем, ордакш сценадонть нупальсэнть улицятненень, седеяк визьксэль Теряйненень. Сон аноколь туемс нинзэ юдмасонзо лангозонзо ахолямодонть, превстэ лисезень палыця вановттонзо модань пачк. Эйсэнзэ даволкс велясть нусманя-ризкс ёжотнемельтне.

Лиссь лиякс.

Кулелямодонть майсевиця Теряень низэ цярадизе кенкшенть ды тусь капшазь кудов. Мелензэ топавтызе – «стардызе» «злыдарь» поланзо. А Теряй аламось аштезь лиссь мельганзо ды сайсь ки Черькаень Наталень ёнов, кинень яннесь шешкезель.

Тусь эсензэ лембе-келей пизэстэнзэ, таркастонть, косо чачсть-кассть кавто цёранзо, тусь зярдояк-зярдояк а велявтомга. Теемс истямо эскелксэнть ульнесь ашождыне, те кандсь ламо стакасто ды шкань таргсезь аютыця седейризкст. Кадомс пиземеде-даволдо ванстыця потолоконть, лембень кирдиця стенатненень, весементь, мезесь тонадовкшнось ламо иень перть, кадомс эйкакшот – те мештесэть стака, алов ускиця кев куломазот. Прялить явоманть эрва кода: эрсить эрямостонть туематкак.

Ульнесь те ламо иеде икеле сундёрковонь куншка шкава. Састо-састо чаразь-велязь, теке мезде-бути арсезь-мелявтозь, вельтясть моданть чевте покш ловнетне. Мольсь васень лов. Китне, латотне, чувотне вельтявсть кецневтиця ванькс ашосо.

Апак капша эскелясь Теряй ашосо копачазь кевъянганть Натушонь кудо ёнов. Прязо эль эзь сезеве калгодо назой арсематнеде, эвтезь эвтсть нусманя мельтне: «Видестэ-аволь теян – эскелян те кияванть? Кирдян ки, косо учить? Мезе тень канды вандынь чись? Па... паряк, мурдамс? А? Ков? Мизолксонь, пеедькшнемань таркас пижнематнеде-ацирьгалематнеде пешксе стенатнень юткс?».

Се ашо-нусманя чись ванстовсь Теряень седейсэ теке исень чись, ды сон, се ашосо артозь чись, кадови раужо ледстнемакс Тоначив туемазонзо.

Од пингестэнзэ Теряй косто-бути ловнокшнось: ломанесь уцяскав сеньсэ, а соды, кодамо уцяскавокс тензэ улемаль. Мертяно, цёрантень, седеяк, маряви, авантень, пазось эзь максо чачтнемань талика, дёп. Содавольтькак сын, кодамо те уцяска – шкинемс, важдамс, кастомс пакша, – секень вант, кой-кить... ормазкадовольть. Иди теде – ...асодамось.

Теряй те ёндо ульнесь уцяскав. Эйкаштнень чачомаст казть тензэ чансть, казть покшкелей, чиревтеме мастор, конань, кармась содамо, лемезэ педагогика. Секс тензэ тень кувалткак стакадо як стакаль перьгедемс эйденё-эйкакшонь вечкевикс куростонт.

Кие содась алкуксонь тувталтнеде, конатне ветизь Теряень ды нинзэ, веёндо ванозь парсте, оякчисэ эрицятнень, явомантень? Ансяк сынсь. Асодыцятне, ланга-верьга арсицятне сеске сюлмасызь вечкеманть марто. Кея, Наталь-Натуш эждизе умок урвакстозь, умок аволь одтнеде цёранть, чаракавтызе, колдовизе-мунизе.

Вечкема... Сон, кея, чумось. Ды сон, варштындерят седе домкасто эрямонтъ лангс, истя, паряк, улияк. Эно кие? Зяро сондензэ морот моразь, книгат сёрмадозь, пьесат-фильмат невтезь! Эрвась ёвтни вейкеде: сондензэ мазый виев неже вейсэнъ кошонь пурнамсто, полыямсто мезеяк арась. Вечкемась, кемевтить, – вейсэнъ эрямонтень кевень юр. Сондензэ «тантей», нардев, кея, иля вешне. Э-эх! Улевельгак истя, кода сёрмадови-морави, – зняро явицят, зняро урозэйкакшт, ськамоств, цёравтомо эриця ават авольть майсеве, зняро сельведень эрькть моданть лангсо аволь уле. Вечкемась, умок эряволь видькстамс, – те прыця тештень кивчкадема эли валске мартонь сув. Варшты пси вановтсо чипаесь ды панжови мезе кекшневь...

Паряк, те оргавтомо сусласькак, конанень мерить «вечкема», лездакшнось зярд-бути валовомс кавтотненень вейс. Паряк... Секень вант, Теряень превстэ а тукшныця мелеськак – куш иешка эрямс олячинь валдосо, а марямс кежтнеде каргоць, лиясто кижнэзь пижниця вайгель, седеень пупсиця валт – лездась тенст васодедемс Натуш марто. Шумбрачинь пултыця кежтнень-сёвноматнень таркас, марявь сестэ Теряйнень, кармить кецневтемензэ кенярксто пешксе вановтт, мизолдыця турват, чевте, седеень эждиця валт... Кода эрямс паронтень апак кеме?

Бульчом, ломанесь уш шкинезь истямокс: кеми валдос, уцяскадо, чанстте пешксе эрямос. Мезень кис эно, сынтест самс, кадык аволь свал лембе, аволь свал важов, моданть лангс? Ченярдомо-ченгеме? Чинев вецана чейдавкссо ботамо-шлебердеме?

Нимилявнекс ливтнестъ ды эцнестъ лавтов лангсо ловажань кудыинтень мельтне: «Эрямот, Теряй, кемть, карми арсезентъ кондямокс: ванькс, сэтьме, вейкенъ-вейкенъ марязь, вейкеде-вейкеде мелявтозь, олячинть танстензэ марязь...». Лиякс сестэ эрямонзо эзизе нее. Кемсь цёрась, кемсь, кемсь.

Истя ушодовсь Теряень од эрямозо. Лия кудо, лия стенат-потолок, лия кенкш, лия стувор, пенчть... Лия аваломань, лия вайгель, кортамот... Допрок, вейкенъ пес лия!

...Кода-бути вестъ, телень сэтьме ашо чистэ, совась «Вайгель» газетань редакцияс Теряень кирдажозо, кулялопас свалшкань сёрмалициясь-поэтэсь Панькин Миколь. Теряй ськамонзоль. Стувор экшэ витнесь – псилгалесь – печатазь та-кодамо текст. Витнесь, кода икеле кортыльть, гранкат. Миколь апак кйсе лоцьк озась каршонзо. Саизе прястонзо шапканзо ды путызе кумажанзо лангс. Ловныциясь кадызе ловноманзо, саизе Миколень кедьстэ сёрмадовксонзо. Вановтозо кирдевсь лемензэ лангсо. Турванзо явовсть мизолкстонть. Ловномонзо эзь карма.

– А содан мезе, кодамо сюпавчи потсонзо, лемень кувалт видьстэ мерян тетя: кеменьс понгить, эрявикстнэде эрявикс! «Рудаз», видькстак, ламо эйсэнзэ, койме эли коймине тетя анокстамо? – пеедькшнезь, сыцянт сельмс ванозь мерсь «Вайгелень» прявтось ды путызе Миколень «шедеврэнзо» эрявикс кувтас.

Кортазевсть пиреде-менелькстэ, теде-тонадо. Ледстизе кулялопань свалшкань авторось Теряень од латало эрямодонзо кулянтъ.

Теряй мезеяк эзь мере. Стясь таркастонзо, зярыяксть ютась, кедензэ удало кирдезь, нупальганть мекев-васов, варштась стуворонзо икеле озадо аштиця цитница касмо Панькин лангс ды мерсь тензэ:

– Кода тон, Миколь, арсят, темась те, поल्याmodo, сравтневиця? Эрявикс минек кулялопантень? Мезекс те тонеть, лиятненень, кода мон эрян-пиштян ят лато ало? Мезень лезэ? Кельть човсемс? Мерть, кортамонок теде пекстазь, – превть макссь ялганстэнь Теряй ды озась тарказонзо.

## Эсеть эйстэ а туят

Кинень мезе, яла мерить, Инешкипазось кази. Кинень куломазонзо резэмс коник лангсо, чивалдос а лиснемс, кинень экшелямс чанстенъ эрькесэ. Кинень мезе... Вейкесь кувака-казямо иеть ютавты, тарди-мелявты панжомо экшсэ, омбоцесь – эри-важоди олячисэ, топавты лезэнь, кенярксонь кандыця тевть. Кинень мезе...

Черькаень Натуш вечки эрьва мезень таштамо. Мезе понги кедь малас – сонзэ. Чемев эске, ёртозь картъ, лавсь, лазпеть, суликат, эрьва кодат квитанцият, оршамот, кедьгеть... Кодаяк а нардасак трямякань обуцядонть ярмаконъ таштамонтькак. Машты, машты трёшникень тееме-ванстомо...

Ламо иень перть пурнавсть кармотнеде-курмотнеде аволь аламо. Веенст понгавтнезь кескавтнева, лият путнезь эрьва кува чавнозь лавсятнева, ламо кой-мезть нерьгстнезь эзем ды коник алкстнэва. Сынъ кирдевить кудосо, кудыкеле, латало. Зярдэ мезеяк эряви муемс, вешнек чоп – а мусак, эли дух а муеви, ёми.

Весть телевизорось ёвтнесь-невтсь Америка ёнксонъ аволь сыре, куншка иень, ськамонзо эриця авадо. Сон майсевсь таштамонъ ормасо. Кандтнесь квартиразонзо эрьва ёндо эрьва мезть зняро, эзь кадново тарка, косо удсемс, а кува ютамс, эль лисневсь кудостонзо ушов. Эрямо тарказо тыц пешксе ташто, аэрявикс, яжавозь, ёртозь кармодо-курмодо. Эзь сода пайстомо авась, кода улемс, мезе теемс. Аволь весть пачколось сельведень нолдамос. Лезэ? Кодамояк! Кортак-иля, мурнек-иля, лезэ иля учо – орма. Те ансяк мереви – пазонъ казне.

Те аволь кецневтиця сюжетэнтъ Теряй ды Натуш ваньызь телевановтсто вейсэ. Теряй кемсь: невтезесь кармавтсы нинзэ лиякс ваномо эсь «орманзо» лангс, а карми кандомо кудонтень мезе понги сельме икелев. Сеске сон тензэ мезеяк эзь мере. Ютасть кавто-колмо чить, ды зярдэ низэ косто-бути усксь эйденъ нилень таркас колмо чарыне лангсо янгазь чарынькай, эзь кирдеве: ледстизе ванозь «кинонтъ».

Кавонест атят-сырькайтъ кочкасть ведьинзейть. А пек кецневти те тевесь. Вельть пуцият ацавиця нетькссэнзэ салмуксетне! Верь пупскесэ вельтявить кедеть, а оршиндерят калгодо коцтсто стазь кувака ожа панар, кедезэть – варьгат. Сень кис куроксто пешкеди кедьгинеть – а налкстават. Кочкак. Теряй эскельдьясь нинзэ малас ды пшкадсь тензэ:

– Минеккак кудонок, латалксонок Американъ се авантъ ёнов молить. Мезе ансяк арась, мезе ансяк а кирдеви! Ней те колмо чары лангсо крандазкесь латало, умок уш тосо лавсь усксеви... Мезекс пурнык те каладырькантъ, эли сизьгемень иесэть чачтомо арсят? Латалкось тыц, – снартсь атясь превть максомс, мерсь пелезь, лепштязь вайгельсэ – илязо цяраде пурьгине. Арась, истя, кецневтизе, эзь лисе. Маряви, кинось, куш кенжинень покшолмасо, – лез-

дась. Атянзо мереманзо – нилинзе. Вал эзь правто. Ялатеке пазонь «казненьть» ёртомс шукш-пряс тензэ ульнесь ашождыне.

Ковгак а молят: кинень мезе...

– Мезекскак ды маштови, яла думаян, – кода-бути зярыя шкань ютазь, таго пупиця инзень кочкамсто, тевензэ апак кадо мерсь Натуш эсь прянь идемга. Ёвтынзе валтнень сэтьместэ, апак машинете, прок чумонь марязь. Ёвтынзе ды венстизе вить кедензэ верев, вановтонзо ике-лев понгсть инзеень зярыя раужо-сэнъ цюцёвт.

– Те а истя, – эзь са Натуш марто вемельс Теряй, кавто ёнов чиремтнизэ прянзо, – «маштови»... Валось виде, ансяк содама тензэ онкс. «Маштовицятнеде», мезть понгавтнезь, вачказы, аравтнезь эрва кува ды ванстовить ламо иень перть, – озязонь нерь. Астака понгомс, кода ченьксэнь эли нарконь вечкицятне, кода Американь се авась, таштамонь полонс. Кельме калмонтень кодаткак сюпавчить а эрявить, а сырнеть-мезть, а кармот-курмот...

Обуцянь те ёнксось – таштамс, ванстомс, – а берянь. Тевесь лия, зярдэ пурнави-таштави мезе понгсь, апак онкста, апак сода ды апак арсе – карми-арась эрявомо косто-бути кандозесь эли муезесь?

«Косто те оймень костиця апарось педясь Натушонь обуцяс, кода эйтэнзэ менстямс?» – аволь весть, аволь кавкстькак совсесь Теряй атянь прязонзо. Виде-аволь, марявсь тензэ, истямо коронтень юрокс ульнесь текесь: вейкинекс, вейке эйкакшокс касомазо. Паряк, гентнэ ды кодаткак лия тувталт «лездасть» тенень? Содык терявтык...

...Меельце шкастонть кудазоравась чапсь истямо кой: кофе велькс марто симемс чизэнзэ весть. Валске марто ярсамонь прядозь. Ансяк. Чикуншкат, чокшне – арвочине ведь, компот, чай эли ловсо. Кой – улиак кой. Сонзэ, вадря-берянь, топавтома. Ансяк вана...

Теряй атя умок-умок майсеви верень ламбамочиденть. Кирдить, ванстыть эйсэнзэ таблеткатне ды диетась. Секскак сахар марто а мереви симемс-ярсамс а теде, а тонадо. А каят кофе кечинезэть сахар пеельнернесэяк! Диета... Ансяк те симемапеленть, седеяк велькс марто, ули, кадык лавшине, танстезэ, чинезэ, совавты, текенекс, эйзэть потмовий. Секс сон вечкеви атянтень. А тесэ – кой!

– Содат мезе, монень чизэнзэ кавксть эряви, – яволявть Теряй весть валскень ярсамсто, вакссонзо стувор эшксэ озадо аштиця Натушнень. – Пельпенчке яжавтозь кофе ды пелькечине ансяк лаказы ведь, монень саты. Яла тансть, яла аволь кода чаво пси ведь пансят. Куш тень эйсэ седеенть витемс.

– Арась, арась, ансяк кода мон меринь! – цяр путызе ды шаштызе апак прядо кофе кечинензэ Натуш; мештензэ икеле вить кедень сурсонзо юхаезь, мерсь кшнинь вайгельсэ, пря максомо эзь арсеяк, кирдсь эсензэ: – Чизэнзэ весть ве пенчке! Вот так вот!

Теряй лангс путсь пшти сельме, вансь мельганзо покш пря коршокс – мерезденть верьга атясь илязо симе. Марясы икельце кудосто эли косто лиясто сиянь пенчкенть чольдердеманзо эли чайникенть тыжнэманзо, сеске чии, эли каяты кудонтъ келес: «Тон таго кофе! Зяроксть тетъ мернинь... Дух не слушается...».

Теде мейле ушодови уроконь кондымо: «Мон уш тетъ ёвтинь телевизорсто марязденть, ледстнинь – свал кофеде симнезь, ломанесь теєви кофеголикекс. Теяк – питнезэ те симемапеленть... Содат. Аволь кода чаентъ. Те истя зяро целковойть «симневить» ковозонзо? А иезэнзэ?! Думаешь? Сайтъ ручка, озак ды ловт!».

«Теєват кофеголикекс» тандавтнеманть Теряй мезекскак эзь лово, пеедькшнесь ансяк. А вана ярмаконь ютавтомадо Натушонь ледстнеманзо, «озак ды ловт» валтнэ совсесь мештезэнзэ чеменев изамо пеекс.

«Мекс, мекс сон, Наталь-Натуш, – кирдсь мельсэнзэ, яла кевкстнесь эсензэ Теряй, – эрямонтъ мазычинзэ-питнейчинзэ онкстни ансяк ярмаконь таштамосо? Оймесь косо? Меремс тензэ? Пшкалинь. А лезэсь? Мезеяк полавтовсь? Арась. Пазось, тагояк мерян, максы эрванень сень, мезе максы. Лиякс а велявтсак, а путсак.

Саик, невтемань кис, Паксютонь Алёнь, Пичепесэ, эйтэнек кемень кудонь трокс, эри Груня нинзэ марто. Допрок, тунь, дух, а яви мель ярмаконь пурнамонтень ды ютавтомантень. Зяро ютавты сон эрва кодамо журналонь-газетань сёрмадстомга, зняро аволь велесэнтъ, буесэнтъкак а ютавтыть. Паряк, а эривитькак зняротне, мезекс? Те кевкстемась инжеккак тензэ а пачколи. Мезе илязо саво рамамс, питне кевкстни чуросто. «Мезе эриви – эриви, рамама», – вана сонзэ мелезэ-коезэ. Алё а лови ярмаконтъ эрямонь кузтемасонтъ весемеде сэрэй чалгавксокс. Ды те пек паро! Алё-Алексей а лови эсь прянзо урекс, ярмаконтень нулгодькс савтницякс, а сорны поень лопакс эрва нулав целковоентъ икеле, а озны. Икелечидентъ верьга-ланга а мелявты. Зепензэ чавот, сень кис оймезэ валдодо-ваньксчиде пешксе. Истятнэ, сюрморкс айтязат, вастневить эрямонь килангсонть аволь сеедьстэ. Педе-пес видестэ ёвтазь: «Эсетъ эйтэ, седе, мезе тетъ верде максовсь, а туют».

## Каня сельметъ таргизь!

Астяко ёвтазь: эрямонтъ эрямс – аволь паксянь трокс ютамс. Аламнеде лиякс ёвтазь: ломанентъ содамс – аволь вайгельпе ютамс, ютама мартонзо латкова-луткова сядо эли, паряк, тёжа вайгельпеть.

Ульнесь кизэнь маней валске. Пичеледе авасоло пандо алга чудиця леентъ вельксачирева, зярс эзь кенере келейстэ варштамо чись, удомаст явавтнестъ сувонь кельме пельть. Пиресэ эмежтне ды умартне лембе, састо ды кувать молиця пиземедентъ ургатетстъ касомо – виень-потьмежачинь таштамо. Сынъ кецнестъ ды эсь пачкаст кучнестъ сюкпря летькень кучиця менелентень, лембень раштыцянтень.

– Кодамо коштось ванькс! Лексят лексевлить. Течи вальсемат модамартне, шкаст, чинь-колмонь ютазь потмозост а совават, – ледстизе Натуш, удомадо мейле кургонь автнезь, ансяк кавонест Теряй марто лиссть кудосто ды валгсть кузтемпес. Аванть лангсо каркске марто валдо-пиже човине коцтонь вень кувака паля. Секс валскень экшедентъ эзь аштеве, мерсь мезебути эстензэ марямга ды юрк совась, теке чеерь варязонзо, кудос.

Теряй кундась тевс. Васняк тонгсь резинань кемть. Совась панжадо кенкш латалов, сайсь модашка. Келейстэ эскелязь ютась вальмало путовкс «умантень» ды кундась мерезентъ топавтомо – вальсеме. Кирда, модакикс, мельганзо омбоце... Тевесь мольсь. Зярдэ тесэнь путовкс «паксясь» прядовома маласоль, састыне сась теке удомань оршавкссонтъ Натуш.

– Те зярс эзик прядо?! А-я-яй... Лыкама седе, лыкама... Мон арсинь... Капшак. Пиземе илязо туге. Мейле а соват. Вот так вот! Несак, зярошкат кассть? ...Ярсамо адя, – паро ёжосо черькстась прясонзо, кончтась ды прядынзе кармавтоманзо. Теряень апак учо велявтсь ды сыр-гась, пиже янганть нурькинестэ эскелязь, кудов. Модемстэ кайсесь превсэнзэ, кодат тевть теема течи васняк, мезе тантейне, седеень витиця путома стуворс чикуншканень. «Тевтне – тевть, а пекесь соды эсензэ!» – марямга прасть кургстонзо валтнэ, сонськак эзизе редя.

– Прядса икельксэм, сован! – серьгедсь мельганзо Теряй, колызе валскень гайгиця экше каштонть, ды поладызе барцаеманзо, мель путсь седе парсте вальсемс модамарень эрва куракшкентъ. Коштось экше. Тень лангс апак вано, кутьмерезэ ялатеке начксь панартомяк.

Эзть юта вете минутаткак, таго вайгель, ней кудоужосто, веёндэ:

– Кежень илить савтне! Кеменьксть эждеме а карман! – серьгедсь ярсамонь анокстыцясь ды выр-вар тусь эрямо пизээнзэ.

Мельганзо, кадызе тарказонзо, модакиксэнтень, модашканзо, сыр-гась, стакасто эскелязь, вальсицяськак. Кузтемпесэ каинзе пильгстэнзэ рудазов карсемканзо, оршизе панаронзо.

Ансяк панжизе кудокенкшентъ, стуворонтъ вакссо стядо котьмиця низэ варштась совицанть лангс, ледстизе:

– Кедеть шлить? Аволь, аволь тесэ – ушосо. Вант, иля пургсе, таго монень сави мельгат нардтнемс. Кедеть нардтнить палманентень эскс понгавтозь нуласонтъ.

Те «инструкциядонть» мейле Теряйнень савсь лисемс ушов. «Фу, допрок стувтыя теемс тень сеске!» – ютась пряванзо, янксезевсь. Сон шлинзе-нардынзе кедензэ, топавтызе кармавтозентъ ды апак эрязкале совась кудос.

– Озак! – нулновтсь прясонзо ды невтсь сурсонзо озамкаентъ ёнов азоравась. – Каян сывельям. Печксек кши. Аволь, аволь те пеельсэнтъ! Оно сеньсэ. Човинестэ бажак! Конёвнетъ мекс эзить сравтне? Теньгак тетъ ёвтама...

Теряй керсесь кши, таргась стуворпотсто пенчть, кандсь тона кудосто нинстэнь эземне. Окойники озасть стувор экшс.

– Мекс конёвнетнень пест эзить мездя? Паморькстнэ киякссо улить! Каня, а чарькодеви, каня эзинь мерне? Кинь учат? Пенчентъ, пенчентъ мекс аволь сень саик?! Ваканот седе малав шаштык! – прок эрямо парьстэ валозь валовсть Натушонь кургсто кармавтоматне ды превспутоматне, эйстэст, секень вант, тармазкадат. Кода кирдсь сынст атысь, а чарькодеви.

Теряй чатьмонсь. Сон содась, пе те «уроконтень» карми а курок. Пенчезэ ды пейсалазкензэ содасть эсест, чевелясть – пештясть пеке. «Уроконтъ» кувакачидензэ теке ведьс вансь.

– Вант, паморькст иля правто масторов, комак ваканонтъ вельксэс! Текень содан, эрва чистэ мельгат ветексть тенсян, вот так вот, – ярсамстояк эзь чатьмоне, превть макссь, яла тонавтсь, кармавтсь стуворонь прявтось. – Саик, саик турваужостот педязь кувинентъ..., во-во, текень учинь, – кедькоморсонзо... Ну кие, кие истя тейни? Каня а чарькодеви – сурсо саема, сур песэ! – тень мерезь, венстизе вить кедензэ ды невтизе кода эряви – невтий сурсонзо нардьзе педявксентъ турвастонзо.

Стуворонь азоронтъ моронзо кунсолозь, Теряй сэвизе сывель марто модамарьям ваканонтъ, симизе кечине кофензэ, ёвтась сюкпря ды чатьмонезь лиссь ушодозь теვენзэ прядома.

Вальмало «уманзо» прядомадо мейле ютась умарьпиресэ путозтнень вальсеме. Сынъ озавтозь байтак шкань ютазь. Вишкинетъ. Шкасткак эзь са. Эйстэст ветешкатнень пирень прявтось нерьгстынзе човор газононь тикше марто. Эль-эль неявить. Вейкень Теряй эзизе реда, цёх керизе, керявозь модамарень нетькскетне вельтявсть модасо.

Тень Теряень вакса яннэванть састо модемстэ неIZE азоравась. Неезdentъ Натушонь ёжопонанзояк стясть, пачканзо кивчк ютась псинь нал, соракадсь, теке маштыкс куродьзе. Сельмесэнзэ кивчкадсть-чийнезевсть кежень сяткот. Сон вачо вадовокс каявсь каршонзо стядо, модашканзо лангс нежедезь аштиця лов ашо пря атянтъ лангс. Аноколь раздемс.

– Каня а неят, мезе теят, каня сельметь таргизь?! – кежтнеде сорнозь, пирень келес пижнезь, автордызе атянтъ кедьстэ модашканть ды весе вийсэнзэ, теке превстэ лиссь, вередемсь невтемань кис яхоеме-вальсеме. Цят шка – илыкезэ маштсь. Варсодизе псинзэ пачк модашканть Теряень пильгензэ ваксс ды поладызе тонавтоманзо ней уш кельсэ: – Кодамояк теветь а тееви, мезекскак а маштоват, чаво ломань, ничего тебе не надо!... – пижнезь-сялдозь, Наталь «човсесь» мирдензэ. Прядомакс цюх сельгсь ды велявтсь, полавтызе мелензэ, мекев, кудоёнов.

Теряйнень эряволь сеске туемс аксунгалицянтъ икельде: а мезть кунсоломс кежсэ пургсиця ломанентъ, сонзэ ормаза моронзо. Сон сынст содасынзе. Тейсь ильведькс – эзь туе. Маряздентъ-неезdentъ гувк тапардызе пси, эрязкалезевсь седеезэ. «Мезень кис, мезень кис?» – теке кевкстнесь сон. Прязо налкставиця мельтнеде увнось. Эзь сода, мезе теемс, ков модемс. Варшась икелензэ усксевиця модашканть лангс ды прянь нолдазь, састо эскелязь сыргась пирекуншкава янганть вирь ёнов. Сон ушодови Черькаень Наталень уличинзэ-моданзо пестэ сеске.

Торох, дух а мезень кис лангозонзо каявомась, маней менельксэнь келес пижнемась, прясто кочкаряс покордамось эзь максо прятень арсемс мездеяк лиядо. Лепштысь...

«А! Полавтомс эрямонь мазычинть, эрвела, ванькс ёжотнень модамарень эль лексиця нетькске лангс! Кодамо авечкема ды нарьгамо оймень ваньксчи лангсо! Кодаяк а чулгови, мекс

истя? – лакасть, чавсть авидечиденть валтнэ-мельтне, кевкстематне Теряень прясо. – Кинень пшкадемс, мезе теемс?

Вирь, вирь, мекс чатьмонят? Мекс тынь, кувака рунго пичеть, вал а каятадо кисэнь? Каня а марясынк мештестэ лисиця кувсеман? Ёвтынк меленк, кода тень улемс? Саема, паряк, латалк-сонь стенас понгавтозь пиксэнтъ ды... Мезе лия кадовсь? Паряк, ёвтатадо мель, кода лисемс кажостонтъ? Те кодамо эрямо? Ужо-ужо... А кие сестэ, арсек, тевень топавтсынзе? Ушодозь эйтэст аволь аламо. Аволь, малавгак аволь ансяк пандянь-кардазьютконь! Лиянень сынъ а теевить, монень, лексек-пувсек, ускомат. Секскак тоначив туемадо мельтнень – шукшпрыв. Те истя. А кода улемс вейсэнь эрямонтъ марто? Кода? Муемс лия эрямо тарка? Муинь... Эрямс ськамот? Теяк... Аволь макшов мукорян. Чангодть, Инешкипаз!»

Модамарень керязь нетькскедентъ таргонь перть Черькаень кудосо кирдевсь кельме кошт, коня алга варштавкст, пеень пачк ёвтазь кавто валт: «уле» ды «арась».

«Кирдемс мештесэть зняро кежть, сэредстиця, навола ризкс ёжот... – арсесь Теряй Натушонь пукштяиця, ордакш обуцядо. – Инешкипаз, каня тень туртов чачозтяно? Мезень кис аванок зняро майсестъ ды мелявтсть мартонок? Лиси, сакшнотано тей вейкенъ кис: майсевеме.

Туемс? Ков, косо ды ки монь, сыре каргонть, учи? Косо кемемась, колмоце муевксэсь карми седе мариця ойме, валдосо гувкаиця? Илязо лисе седеяк пшти», – яла онкстнесь, яла кайсесь эськанзо Теряй, ды кода-бути ледсь мелезэнзэ умоктояк умок, тона нинть марто эрямсто, ловнозь Лев Толстоень «Крейцерова соната» келей ёвтнемазо. Эйсэнзэ невтеви семиясо эрямонтъ алкуксонь «мазычизэ», сонзэ «танстезэ». Сон истямо ды невтезь истя – удомазо цёранть сезневкшнесь аволь ве таргонь перть. Эйсэнзэ тешкстави: вейксэньгемень вейксэ процентт семиятне-кудораськетне – эрить сёвноты-тюрезь, мельга-мельцеке салава ваннозь, микш-незь, полавтнезь. Стака ульнесь марямс истят валт ине философонтъ пельде.

Ды аволь ансяк Лев Николаевич! Лия сёрмадейтнеяк ёвтнесь ды ёвтнисть кудораськедентъ аволь цяпамонь валт-мельть: «зона», «колония», «палач»; ававттонть – «мучказ» («надзиратель»), «полон». Астяко тюрьмань валт-лемть педявтнесь! Ды... педявтнисть.

Секс Теряй вельть эзь правто туемс Натушто, те кежсэ-ацирьгалемасо цилькаиця эрямо таркастонтъ. Кирдсь кор. Кирдсь пеень сускозь, кирдсь кода маштсь...

«Тук, варчик! Семань Итёк оно сисемксть кайсесь кирьгазонзо ашко, совсесь содамокс. Сисемексть! Ундоксткак – тейтернетъ-цёрынеть – кенерькшнесь зярыя таркава нолдамо. Кадык эно цёрась улелель нузякс кандо эли кодамояк меельце симагай. Покш, виев, мазый, тевсэ – сырнень кедь. Вейкесь «нитнеде» санонзо таргась, омбоцесь, колмоцесь... Сисемецесь истя карсизе – сельгсь ды ношкстась эйтэнзэ мейсэ авазо чачтызе. Оргодсь вень куншкат, ков сельмензэ несть».

Кежей Наталь, сезеви эрва штелькстэ, акирдевица кор, сень кис винапетнявкс а кай, валонзо лангсо – азор. Мезе мери – топавтсы! Уски-важоди лишмекс, сивекскак а эряви. Кудоятконь тевтнесэ – дёрдо дёр! Секскак Теряй атя лия ёнга ливтнемадо арсематнень малавгак эзинзе нолдтне.

Мезесь кедьсэть уле – уле, а редяви, ёми – чарькодъсак, кодамо питнейчи, мезе ёмавтыть. Лиясто мик ёмавтыцянтъ летъкемить сельмензэяк, нолдасынзе кедензэ. Секс...

Ёгань Теряй тунь эзь чумондо Натушонь, тунь. Каня аламо цёрат-ават, одт-сыреть майсевичь панжоме экшсэ чумочинь кис, конань эзизь тее? Чумонь теицятне, васняк, – тетяст-аваст. Сынъ, теде малавгак апак арсе, апак сода ды апак редя, «казить» эйкакшост туртов берянь кор, анокстыть-ствятыть нолажа киланга эскелицят, тюрьмава аштицят. Истя лиссь Натушонь аванзо мартояк. Сон а чумо, лиссь истя – кастызе кемнилее иень перть пакшанзо колмо цёрадо мейле вейкине кольнягай тейтернекс ды казизе тензэ ордакшонь-аксунонь «орманть». Шкань-шкань Натуш марявьс атянтень натой жаль.

...Аволь уш истя сеедьстэ ёндолтнэ кивчкаесть ды сезнесть Пичеле велькссэ новолезь пиземень чопода тандавтница пельтнень. Ульнесть седеень кецневтиця, маней, мизолдыця читькак. Кодамокс илязо уле менелесь, эрямось ве таркасо эзь аште.

Чинь тевтненень путозь пе. Теряй атя озадо аштесь кузтемпесэ. Оймсесь. Икельганзо, пирепеваст, ожо меште пичетне чатьмонезь учость чокшненть самонзо. Вановт кецневтсть пиресэст пиже ябунцясо копачазь умарьчувтнэ. Кодат тустот ды руکشнат лопасть! Сэнь масторонть азорозо кенерсь валгомо оймсеме. Конизе сельмензэ ды кекшсь пичетнень томбалев. Виренть велькска менелесь артовсь палозь палыця ожо-якстерестэ.

Сась, кода свал апак учо, прызонзо ледстнема вейке ковол шкастонть, зярд паротнеде, маней читнеде потмуратнень коряс, Натуш марто вейсэнэ эрямосост седе ламольть. Одольть...

Зярдояк а стувтови Домка эрькев экшелямо якамост. Эйзэнзэ велестэнтэ вайгельпешка. Ансяк ютамс сынст келей лаймеванть ашождыне. Теине, тей-тов менчевиця яннэсь ветясь тов куракш, карксамга сэрей тикше юткова, начко-рудазов таркава. Видестэ лемдекшнизь умонь эрицятне – Домка. Алкукс истя. Текеде, паряк, истямо ванькс ведезэ – сельведь. Эйсэнзэ кирьгава аштезь шождасто неявить-лововить пыльгесурот. Перьканзо касыть, мазылгавтыть эрькенть ды тесэнь ёнкстнэнь, калень, эрьбань, ламарень, чевгень ды лия эрьва кодат куракшт.

...Шказоль чикуншкадо мейлень. А куш а каш. Оймсесть чувтнэнь потсо нармунтне. Псиденть чатьмонсть, эзь маряво тикшенть потсто тастынетнень кайгасо налксемасткак.

Эрькечирентень аламнеде апак пачкоде, васенцекс, тунь апак визде, кайсесь, мезеяк эзь кадо лангозонзо, Натуш. Киде виздемс? Оршамонзо, венстизе кедензэ, понгавтынзе рацяня пешкс куронь нурыгиця тарадпес. Састыне, ёжонь марязь, ожо пси чуваронть ланга ютась, ике-лев ванозь, веденть малас.

Теряй понксонзо-панаронзо каямо эзь эрязкале. Стядо аштесь нидензэ авасоло ды вансь сонзэ аволь сэрей, аволь эчке, теке тейтерень, рунгонзо лангс. Вансь сельмень апак кончтне, сэвезь сэвсь вановтсонзо. Некшнize нинзэ эрьва кода, эрьва косо ды, содави, аволь весть, а вана истя, пижесэ пирязь эрькечирева, ожо чуварнэ ланга эскелицякс, эрьвела ёжосо, прясто пыльгс штапокс, – васенцеде.

Зярс-бути Натуш аштесь стядо, вансь чипайденть цитница эрькенть чамас, аламо шкань ютазь вановтсонзо ютась куракшов, пиже кундокс неявиця, чиреванзо. Ландясь ды састыне нолдызе вить кедькоморонзо ведентень. Икельганзо тей-тов укшность вежаськедеяк вишкине сияждыця калнэть, сэперькеть. Кечинекс кедькелензэ теезь, амольдьясь ведь ды пургизе-начтызе мештензэ. Стямсто потензэ ланга чипаенть визьксэнь асодыця вановтто нолаштсть, теке сиянь эрьгинеть, цитница ведьбайгинеть. «У-у-у, кодамо экишне!» – рунгонзо витемстэ таргизе «у-у-у»-ть сорныця вайгельсэ. Ялатеке тандавтница кельмекс эзь маряво. Кедензэ кавто ёнов келемтезь, прок нармунь сёлмонзо, экшентень апак тонадо, сурневксэнь марязь, састо састо совась ведентень – васня кумажава, мельганзо карксамга, седе верьга.

«Вай, вы-ый, кодамо кельме! – цирнезь серьгедсь пертьпельксэнтэ келес, сонсь варштась удалов, эйстэнзэ авасоло палманькс аштиця поланзо лангс.

– Мезть сельметь полгарьгавтнят? Эли эзимик некшне? Кайсек ды бырсэ ваксозон! Иля пеле, а сусктан!.. – серьгедсь Натуш пеедькшнезь ды болдор-болдор тусь «пинекс» уезь. Пильгсэнзэ ботамодонтэ кувтань-кувтань кепсевсть ведьбайгень сырнень сяткот. Тейсь кирькс, мельганзо омбоце...

Теряй кайсесь ды учось, зярд Натуш лиси ведьстэнтэ ды одс невтьсы чипаень валдосо артозь авань мазычинзэ.

Умок те ульнесь, вельть умок! Вейсэнэ эрямоост васенце эли омбоце иестэнтэ. Ды теке исяк! Ваясть сын домкадомяк домка шкань отьмантень. А велявтсыть. Паро теяк – кадовсть кизэнь се пси чидентэ, се экшелямодонтэ, сеть уцяскадо пешксе минутатнеде, теке пиже-мазый панжиковдо, валдо ледстнемат.

## Азгондят, теке лытагай!

...Валскесь ушодовсь кода свал. Эль кенерсь менелень валдось састыне-састыне совамо вальматнева ды пештямо аксялкстнэнь, Теряй штавтывзе лангстонзо кизэнь шождыне вельксэнтэ, чалгась кияксос ды ютась удалце кудонь вальманть икелев: мезе моли менельсэнтэ? Мезе полавтовсь? Тень топавтозь, ёрвалдызе шлямкайсэнтэ чаманзо, нардынзе кедензэ. Оршнесь ды лиссь, панжизе кудокенкшентэ, кудыкелев. Саинзе чаво ведратнень ды мартост калдор-кулдор валгсь кузтемпес.

– Шумбрат, маней валске, шумбрат, якстере вановт чилисема! – паро ёжосо, марямга мерсь Теряй атя, мизолдыця чилисеманть якстере сёлмонзо лангс ванозь. Валтнэнь ёвтась, сыр-гась пиренть трокс «викториянь» пандятнень юткова яннэванть лисьмалангов.

Таргась ведра ды жойсэ каизе эсензэ ведрас, амольдьясь омбоце. Кандтнинзе-совавтнинзе кудыкелев ды кудос ведте пешксе ведратнень. Банянь уштомс кандсь кавто керьметь эчке, беряньстэ лазнозь пенгть, нардынзе голландкасто куловтнень, пештинзе ведте банянь ачеме-нииця покш кедьгэнтэ. Эзь стувто, варштась кардазовгак – нолдынзе пиринестэст ды очкозост каясь товсюро саразтнэненэ.

«Фу, okayники!» – мерсь эськанзо, валскенэ теვენзэ прядозь, атясь. Сон арсекшнесь аламошкас новолемс кузтемпесэ тонадовозь эземнентень. Эзь кенере. Панжовсь пижесэ артозь кудыкельксэнь кенкшесь, ды кенкшалксонть лангс стясь Натуш.

– Тон курук? Стуворось учи, – верде атянзо лангс ванозь, мизолдозь, чевте пельвайгельть тердизе, прысонзо тейсь нулк-нулк, Теряень ярсамо, – кедеть илить стувто ёрвалдомс! Нардамокс нулатне, сапонесь – судот ало, неят.

– Паро, пельсекунданэ ютазь учок! – ахолдась кедьсэнзэ, серьгедсь Теряй пеедькшнезь, сиземанэ апак маря. Шлясь-нардась, ютась кузтемпе малас, каинзе пыльгстэнзэ колошанзо, тонгсь кудонь карсемкайтэ ды совась кудос. «Мекс а улемс, а эрямс эрямонзо истямо вадря ёжосо? – кивчк ютась мелесь, Натушонэ неезь. – Мекс а улемс истямокс течи, ванды, свал? Уле-арась истямо эрямо косяк?»

Учость Теряй атянэ сывелэ марто пачалксинеть, вельксэ петезь кофе кечине ды Натушонэ паневть капста марто чевте прякине. Сон нилинзе верьламбамодо таблетканзо, путсь икелензэ стуворонть лангс конёвлопа, мендизе чирева ды паро мельсэ кундась путозтнень «тевс нолдамо», итьмамо.

Натуш эзь карма атянзо учомо, ярсамонэ кирданзо ютавтывзе совамодонзо икеле. Ней летьке тенстьсэ ахолясь тей-тов, тенсесь киякс. Кирдемс ваньксчи – те, кода кортыть, верьсэнзэ. Теряй пеедькшнесь тень кувалма лангсонзо: «Тон спиртсэ, спиртсэ ёзык стуворонть, киякс латтнэньгак куш иезэнзэ весть! Ве эрий бактерия кудонтень а кадови...».

Теряй ярсавсь, шлинзе мельганзо пенчтнень-вакантнэнь, ёвтась азоравантень сюкпря ды лиссь кузтемпес. «Зяро валдо, кенярксчи ушосонть! Иля нузялдо – амоляк!» – лип ютась пачканзо кеняркс раштый ёжо. Айгизе эземнентэ, ён улезэ озамс. Састыне, атякс, новольсь эйзэнзэ.

Те сонзэ, зярс ушосонть кизэ, зярс эзь кенере чалгамо сёксесь, вечкевикс тарказо. Ваны-арси, мезе тееви-моли менельсэнтэ, кона ёнов кирдять ки а капшиця ашо, лиясто качамо сэнэ пондакш пельтне, мезе полавтовсь эсест ды шабратнень пиресэ. Кодат, мезде ансяк ледстнемат а содавтнесызь! Ледстнемат эйкакшпингедензэ, школасо ды лиясо-косо тонавтнема шкадонзо, кавксть урвакстозь эрямодонзо, аволь аламо эрязь иетнеде...

Озы, нолдасы прынзо, нежедьсы мештезэнзэ улонзо, конясынзе сельмензэ, ды мекшвелекс совить прызонзо, а учить тердема, арсематне, ледстнематне теде-тонадо. Кодаяк тензэ превс а саеви, мекс моданть лангсо таштавсь зняро авидечидентэ, мекс певтеме ламо ды визьксэнь апак сода кенгелить ды теить сонзэ, кенгелеманть, натой эрявикс коекс. Маряви, видечин-

тень озамо таркинеяк ломантне эзь кадо. Маряви тенст нулгодькс чинев кенгелемась медтеяк тантейкс. Те каня превс саеви? Пазонь кучовксокс ламот пряст ловить, тердить паронь, ансяк паронь тееме – раштыть кежть. Мекс истя, кодамояк логиканень а панжови!

Апак учо совась прызонзо мель: ютамс вирьга. Ледсь мелезэнзэ таркась, косо мелят увсо панжсть ды кецневтекшнлизь Теряень валдо-сэнэ покш пря баягинетне. Совась вирень латонт алов. Якसेсь, вешнесь се тарканть, арсесь вастовомс ёвксонь кондямо мазый сэнэ сельме балягиненть марто, талай. Стяко. Эзь муеве. Се мелят ульнесь. Тедеде... Виде, ламот-мезть эрямосонт вастневить ансяк весть! Иля вешне, ютазенть мекев а велявтсак. Тедеде кичиретнень ожосо артынзе шкерьгесь. Эрвань эсензэ шказо.

Сизесь. Эртевьс вармадо умок сяворезь эчке пичес. Озась. Виресь чатьмонсь. Зяро эзь «ствятне» пилензэ, вейкеяк нармунь эседензэ эзь яволявто. Стувтокшнызе, сынэ «яволявнтить» эседест капшазь, кода ломантнеяк, ансяк одшкастост. Ней... Ламот эйтэст уш чикуншка ёнот, ламот тона пелев кирдить ки. Саты, тесэнэ кизэст ютась. Сёкसेсь оно, кадык зярс кекшнезь, чары-тандавтни ожосонзо.

Ваннось перьканзо, кунсолось. Окойники кепедизе вановтонзо вельксканзо капшазь уиця вецана, чопода тюс пельтнес. Сынст тунь а талновты ломантнень ютксо вейсэнэ эрямост. Уить ды уить. Мезе тенст эряви, кинь вешнтить?

Стясь ды теке янганть, чувтотнень-куракштнень юткова, апак эрязкале сыргась кудов.

Натуш латалдо ливтезь мокшнашка эземненть лангсо ваткसेсь модамарть, ватксетнень кайсесь ваксонзо ведте пешксе кастрюлянтень – аноктась ярсамс. Маряви, таго карми човорямо вечкевикс памшамопелензэ – сывелень консерва марто томбазь-чевелязь модамарть. Оршазь авась шождасто, кизэкс, лавтовонзо ланга каязь човине коцтсто ковтыне, прызо штадо. Эно кода лиякс? Ушосонт гай умарьков!

– Косолиять зярс? – прянь апак кепеде, тевензэ апак сезе, музгордезь пшкадсь сыця мирденстэнь. Пельдензэ валонь апак учо поладызе теке вешкезь «кортамонзо»: – Азгондят, теке лытагай, тев а муят... Шукшторовтне апак чуролгавто, апак керсе... Монтемень теяк теть а теevi, учат, яла мон, яла мон кундазан...

– Шказо аволь пелевень... – верьга, казямо вайгельсэ мерсь Теряй, истя ёвтазь валсонзо пугызе тарказонзо аксун нинзэ, ваксканзо келейстэ эскелязь ютамсто.

– Тонь свал текесь, ансяк шканть таргсемс, – кепедизе прынзо тевстэнзэ, лотказевсь ватксемадож, серьгедсь мельганзо, ильтизе келейстэ эскелязь ютыця Теряень.

Кузтемпес ды тосто кудос совамсто Теряй мериксэль: «Мон мезе, барщинас прям эцие? Лекстямс а максат! Эли батракокс сиведимик?». Кирдевсь, эзизе нерькста келензэ, оляс эзизе нолда пейтнень экштэ. Астяко сеедьстэ ледстнесь Пушкинэнь: «Ды иля пелькстне чавола марто...».

Содась цёрась: гувкади толпанья, менельс кирнявтыть толкельтне. Пси карми. Теряй атя од шкастонзо, зяро иеть чадыведекс чудсть – а лововить, ловнокшнось кодамо-бути кулялопа-сто малав истямо «кортамонь» лувдо покш статья. Эйсэнзэ ледстневсть тувталтнэ, конат ветить истямо «важов-сёвномавтомо» эрямонтень.

Те сёрмадовкстонть кадовсь Терентий Тимофеевичень мельс истямо тев. Кодат-бути мелявкт телень куншкат, маней якшамо чистэ, ветякшнызь сонзэ тескень университетэнь педагогикань кафедрас.

Совась аволь покш нупальс. Икелензэ стуворост экшсэ нувсест конёвост велькссэ нилеве аволь од, аволь сырежак ават – тонавтыцят. Кода кирдевсь превсэнзэ – эйкакшонь оймень содыцят.

– Шумбрачи! – арсесь совицясь аватненень, лангаст вановтсонзо ютазь.

– Шумбрачи, шумбрачи! – гайгезевсть, пештизь нупаленть, вайгельть.

Аватнестэ, конёвост марто, Терентий Тимофеевичень вановтозо кепедевсь стенатнес. Эйсэст тердсть улемс истямокс, кодат сынэ, инекс, модамасторонь келес содавикс педагогтне:

Жан-Жак Руссо, Константин Ушинский, Антон Макаренко, Василий Сухомлинский, умонь угрась, мейле мадырось Януш Корчак... Ютксост – вейкеяк ава! «Ха! Те кода истя? Кода чарькодемс?» – абунгадсь сыцясь.

Инжесь нолдызе прянзо. Валгсь менельстэ масторов: пшкадсь штадо пря, домкасто конё-вост вельксэ «майсевиця» аватненень.

– Ёвтынк, энялдан: кить алкуксонь педагогтне? Цёратне, – Теряй невтсь кедьсэнзэ верев, – эли... аватне – тынь?

– Цёратне!!! – вете вайгельть апак тално, сеске серьгедсть вейсэ, пештизь жой вайгельсэст нупаленть. «Вай, авакай! Сынст мезе, тонавтызь истя вейсэ, велуво сеереме?» – арсезевсь «апак учонь инжесь».

Теряй аймельгадсь, эзь сода, мезе меремс. Теке гамадизь пря ланга. Кая эрси истя?

– Мекс эно кафедрасонк, ванан, илядо покордаво, ансяк ават? Прявтонкак ава, – пшкадсь озадо аштиця тонавтыщятненень, лангозост вановтонзо кайсезь, ды теньсэ совавтынзе аёнчис, визделгавтынзе. Теевсь кашт.

Кода илязо уле, Теряй атя ловсь ды нейгак лови те сценанть-вастовоманть вельть ламодо кортыякс. Сон корты васняк теде: эйкакшонтъ тряст-кастост кавто – цёраломань ды тейтерь-ава, тетя ды ава, текенекс, ветиякс ютксост улезэ, малав свал, цёрась. Аволь чуросто Теряень содавтнизь Януш Корчаконь, ине педагогонтъ, валонзо: «Эйкакшт арасть – улеть ломанть».

## Весе ушодови эйкакшпингстэ

Умок, пек умок редязь: ули тувтал ды ули эйтэнзэ лисиця поладкс. Те философиянь сыредяк сыре коесь аравтни-вети тевтнень кода Моданть лангсо, истяня Менельде верьгаяк. Сонзэ виезэ редяви куш кодамо тевсэ-мелякссо ды куш зярдо. Те коентъ эрямостонтъ а ёртсак, виензэ а тертясьть.

Косто, кодамо юрсто ушодовсь Натушонь обуцязо – эрямс лепштызь пружинакс? Мекс кежтне сонзэ кивчкаить эрва ёндо ды эрва мезде? Кодамо, косо тувталось – кирваземс, теке сардыне, а истя, кодаяк чирьстэ ёвтазь валдо, а истя эскельдямодо, озамодо-стямодо эли лиядо-мезде? Мекс? Мекс эрва штелькседентъ, кона чеменев эскеяк а ашти, гувкай, теке толкель, сёвномо?

Нетъ ашожда кевкстнематне а вестъ сакшность Ёгань Теряень превс, а вестъ сезнизь удо-манзо. Онкстнесь, ловнось, кочкесь, мель путсь чарькодемс сынст эрва ёндо.

Сась мелезэнзэ Натушонь ёвтнемазо пиже шкадонзо. Сонзэ ульнестъ колмо лелянзо. Меельгаст кемнилее иень ютазь авазо кандсь тейтерне. Очконардавксентъ лемдекшнине Натальнекс. Кассь «покольнезэ» покштнень ютксо вейкине, тетявтомо эйкакшкекс – някинекс. Кудосонтъ мартонзо эйденъ кельсэ кортниця-налксиця ялгине арасель. Съкамонзоль.

Мезе те вейкинесь, кодамокс кепети-касы, Наталень авазо, кода лелянзояк, эзь арсе. Эзь сода, превть эзь яжа ильведькстнеде, конатнеде аволь аламо лиснить вейкинетнень важдамсто-трямсто.

Васенцесь эйтэст – кольневтемась. Зярдо кудосонтъ, невтемга, колмо эйкакшт, тенст эрявиксэсь (налкшкетне, ярсамопельтне, оршамотне...) явови вейкетьстэ – колмов, зярдо вейке – весе, петнявксень пес, понгить сонензэ: мезеяк тантейне, вечкевикс, мазыйне налкшке... Понги тензэ, текенекс, седе ламо, аволь кодамояк колмоце эли нилеце пелькске. Мезе веши, кодамо питней, чуросто вастневиця илязо уле, – муема ды путома икелензэ. «Покольнентень» – весе. Эрва кода савтнить тензэ! Истя кемекстави пакшанть превсэ-седейсэ мелесь: «Весемеде покшось, эрявиксэсь, виевесь, вечкевиксэсь модамасторсонть – мон! Вейкень пес, мезе перькан, – васняк монень! Лиатнеде, кить перькат, а мезть мелявтомс, стув-тыть. Прявтось кудосонтъ – мон».

Тевтнень, конат теувильть пакшантень, тейсь тарказонзо авазо, эзь кармавто тяканзо, сыргози, тарканзо ацамо, эзь тонавто лиянь мелень ваномо. Эзь чарькоде авась, три истя эсь прянь вечкиця, эрва челькинеде кежиявтниця, ордакш, натой аксун ломань. «Кода а вечкемс эсь умарнеть!» – марсевсь кургстонзо, яла идесь эсь прянзо. Эзь арсе – колы тень эйсэ умонь пингень превспутоманть: «Вечкть эйкакшот удомстонзо эли зярс кельги путомс эзельменть трокс». ...

Ламот, секень вант, се шкань эрицятнеде эзизь сода те валмеревксэнтъкак: «Вейке эйкакш – а эйкакш, кавто эйкакшт – пельэйкакш, колмо эйкакшт – эйкакш». Неень аватнедеяк, маряви, аволь ламо кить марсизь неть сырнень валтнэнь, содавлизыгак, «някат» авольть чачтне, теувельть истя, кода кортави валмеревксэнтъ.

Мезес пачти эйкакшонь сокор вечкемась, Теряйнень шабрань кедьстэ превть кевкстнемс эзь савкшно. Сонензэ содавикс вейкиненень важдамось. Покш ды веженсь цёранзо ютксо – кавксо иеть. Лиссь истя: кавксть кавксо, иеть нинзэ марто трясть-кастсть кавто съкамонькай цёрынеть. Васенценть школав туема шкастонзо – уш покш цёрынель – чачсь ялакскезэ Вежай, теяк, ловт, кассь ялгавтомо. Видяй лелянстэнь уш кавксо, сонензэ... Ве кель-вал муемс зняро иень авейкетъчисэ ашождыне. Сестэ Теряйнень эзь чарькодевкшне, одоль, мезе те улемс тетяк содыль аламо, превскак эзь сакшно, кодат тешкскеть кады обуцязост ялгиневтеме касомась, кадык ланга-верьга – кольневтнематне.

Эскелясть иеть... Эрвань апак неяво, састыне кассь эсензэ, кодамо илязо уле, корозо. Кодат челькеть сын, неть явовтыця иетне, кадсть уцясказост, Теряй содасы...

Кавксо иеть... Натальне сась модамасторонтъ лангс веженсь лелянзо чачомадо мейле кемнилее иень ютазь! Юткось покш. Шкатнеяк лиятальть. Секс тейтернесь кенерсь таштамо съкамонькаень обуцянь ёнкстнэде ламоксть ламо.

Теяк: Наталень аванзо коряс Теряй ламодо од, сюпав, кода тетя, содамочисэ, ламо тонавтнесь, ловнось, сёрмадомань вечкиця. Наталень авазо ульнесь сёрмас а содыця велень ломань. Секс кольневтсь «левксензэ» кода ды мейсэ маштсь, буень апак сода. Теке марто, тиринезэ кадсь тензэ питнейдеяк питней казне – тевень вечкема. Тевтне, асатыкстне войнань ды мельганзо иетнестэ прядо велькскальть. Теяк, кудосонтъ колмо цёрат. Кие карми лездамо аванстэнь кудонь, кардазонь ды пирень тевтнесэ? А эйкакшост ваномо кие карми?

## **Конец ознакомительного фрагмента.**

Текст предоставлен ООО «ЛитРес».

Прочитайте эту книгу целиком, [купив полную легальную версию](#) на ЛитРес.

Безопасно оплатить книгу можно банковской картой Visa, MasterCard, Maestro, со счета мобильного телефона, с платежного терминала, в салоне МТС или Связной, через PayPal, WebMoney, Яндекс.Деньги, QIWI Кошелек, бонусными картами или другим удобным Вам способом.